

四庫全書

集部

欽定四庫全書

集部
四六法海卷十一

詳校官編修_臣李堯棟

侍讀_臣孫球覆勘

覆校官中書_臣呂雲棟

校對官中書_臣范 鏊

謄錄監生_臣桑 英

欽定四庫全書

四六法海卷十一

明 王志堅 編

頭陀寺碑文

蓋聞挹朝夕之池者無以測其淺深仰蒼蒼之色者不足知其遠近沉視聽之外若存若亡心行之表不生不滅者哉是以掩室摩竭用啟息言之津杜口毘邪以通得意之路然語異倫者必求宗於九疇談陰陽者亦研幾於六位是故三才既辨識妙物之功萬象已陳悟太

極之致言之不可以已其在茲乎然文繫所筌窮於此域則稱謂所絕形乎彼岸矣彼岸者引之於有則高謝四流推之於無則俯弘六度名言不得其性相隨迎不見其終始不可以學地知不可以意生及其涅槃之蘊也夫幽谷無私有至斯響洪鐘虛受無來不應況法身圓對規矩冥立一音稱物宮商潛運是以如來利見迦維託生王室憑五行之軌拯溺逝川開八正之門大庇交喪於是玄關幽鍵感而遂通遙源濬波酌而不竭行

不捨之檀而施洽羣有唱無緣之慈而澤周萬物演勿
照之明而鑒窮沙界導亡機之權而功濟塵劫時義遠
矣能事畢矣然後拂衣雙樹脫履金沙惟恍惟惚不暇
不昧莫繫於去來復歸於無物因斯而談則棲遑大千
無為之寂不撓焚燎堅林不盡之靈無歇大矣哉正法
既沒象教陵夷穿鑿異端者以違方為得一順非辯偽
者比微言於目論於是馬鳴幽讚龍樹虛求並振頽綱
俱維絕紐蔭法雲於真際則火宅晨涼曜慧日於康衢

則重昏夜曉故能使三十七品有樽俎之師九十六種
無藩籬之固既而方廣東被教肆南移周魯二莊親昭
夜景之鑒漢晉兩明並勒丹青之飾然後遺文間出列
刹相望澄什結轍於山西林遠肩隨乎江左矣頭陀寺
者沙門釋慧宗之所立也南則大川浩汗雲霞之所沃
蕩北則層峰削成日月之所迴薄西眺城邑百雉紆餘
東望平皋千里超忽信楚都之勝地也宗法師行潔珪
璧擁錫來游以為宅生者緣業空則緣廢存軀者惑理

勝則惑亡遂欲捨百齡於中身殉肌膚於猛鷲班荆蔭
松者久之宋大明五年始立方丈茅茨以庇經象後軍
長史江夏內史會稽孔府君諱覲為之雜草開林置經
行之室安西將軍郢州刺史江安伯濟陽蔡使君諱興
宗復為崇基表剎立禪誦之堂焉以法師景行大迦葉
故以頭陀為稱首後有僧勤法師貞節苦心求仁養志
纂脩堂宇未就而沒高軌難追藏舟易遠僧徒聞其無
人榱椽毀而莫構可為長太息矣惟齊繼五帝洪名紐

三王絕業祖武宗文之德昭升嚴配格天光表之功弘
啟興復是以惟新舊物康濟多難步中雅頌驟合韶濩
炎區九譯沙場一候粵在於建武焉乃詔西中郎將郢
州刺史江夏王觀政藩維樹風江漢擇方城之令典酌
龜蒙之故實政肅刑清於是乎在寧遠將軍長史江夏
內史行事彭城劉府君諱誼智及所遊日新月故道勝
之韻虛往實歸以此寺業廢於已安功隆於幾立慨深
覆簣悲同棄井因百姓之有餘間天下之無事庀徒揆

日各有司存於是民以悅來工以心競亘丘被陵因高
就遠層軒延袤上出雲霓飛閣逶迤下臨無地夕露為
珠網朝霞為丹牖九衢之草千計四照之化萬品崖谷
共清風泉相渙金姿寶相永藉間安息心了義終焉遊
集法師釋曇珍業行淳脩理懷淵遠今屈知寺任永奉
神居夫民勞事功既鏤文於鐘鼎言時稱代亦樹碑於
宗廟世彌積而功宣身逾遠而名劬敢寓言於雕篆庶
髣髴乎衆妙辭曰質判玄黃氣分清濁涉器千名含靈

萬族淳源上派澆風下黷愛流成海情塵為岳皇矣能
仁撫期命世乃睠中土聿來迦衛奄有大千遂荒三界
殷鑒四門幽求六歲亦既成德妙盡無為帝獻方石天
開淶池祥河輟水寶樹低枝通莊九折安步三危川靜
波澄龍翔雲起耆山廣運給園多士金粟來儀文殊戾
止應乾動寂順民終始法本不然今則無滅象正雖闌
希夷未缺於昭有齊式揚洪烈釋網更維玄津重柅惟
此名區禪慧攸託倚據崇巖臨睨通壑溝池湘漢堆阜

衡霍牕牕亭舉幽幽林薄媚茲邦后法流是挹氣茂三
明情超六入眷言靈宇載懷興葺丹刻翬飛輪奐離立
象設既闢辟容已安桂深冬煥松疎夏寒神足游息靈
心往還勝懽西振貞石南刊

梵語頭陀此云精進大迦葉子諸弟子中頭陀第一
王巾字簡棲說文通釋以為王少

作空門文字須曾於宗教留心始得簡栖生平不詳
於史傳觀其所作雖不可謂門外漢然亦僅入門而

已自來以文字作佛事者唐有王摩詰梁敬之柳子厚宋有蘇氏兄弟黃魯直若王子安輩隔靴搔癢而已

齊故安陸昭王碑文

沈約

公諱緬字景業南蘭陵人也稷卨身佐唐虞有大功於天地商武姬文所以膺圖受錄蕭曹扶翼漢祖滅秦項以寧亂魏氏時乘於前皇齊握符於後靈源與積石爭流神基與極天比峻祖宣皇帝雄材盛烈名蓋當時考景

皇帝含道居貞卷懷前代公含辰象之秀德體河岳之上靈氣蘊風雲身負日月立行可模置言成範英華外發清明內昭天經地義之德因心必盡簡久遠大之方率由斯至挹其源者游泳而莫測懷其道者日用而不知昭昭若三辰之麗於天滔滔猶四瀆之紀於地六幽允洽一德無爽萬物仰之而彌高千里不言而斯應若夫彈冠出仕之日登庸蒞事之年軍麾命服之序監督方部之數斯固國史之所詳今可得畧也水德方衰天

命未改太祖龍躍俟時作鎮淮泗如仁夕惕之志中夜
九迴龕世拯亂之情獨用懷抱深圖密慮衆莫能窺公
陪奉朝夕從容左右蓋同王子洛濱之歲實惟辟疆內
侍之年起予聖懷發言中旨始以文學游梁俄而入掌
綸誥蘭桂有芬清暉自遠帝出於震日衣青光方軌茅
社俾侯安陸受瑞析珪遂荒雲野式掌儲命帝難其人
公以宗室羽儀允膺嘉選協隆三善仰敷四德博望之
苑載暉龍樓之門以峻獻替惟宸實掌喉唇奉待漏之

書銜如絲之旨前暉後光非止恒授公以密戚上賢俄
而奉職出納惟允劍璽增華伊昔帝唐九官咸事熊豹
臨猷納言是司自此迄今其任無爽爰自近侍式贊權
衡而皇情眷眷慮深求瘼姑蘇輿壤任切關河都會殷
負提封百萬全趙之袪服叢臺方此為劣臨淄之揮汗
成雨曾何足稱乃鴻臚舊吳作守東楚弘義讓以勗君子
振平惠以字小人撫同上德綏用中典疑獄得情而弗
喜宿訟兩讓而同歸雖春申之大啟封疆鄧攸之緝熙

氓庶不能尚也夏首藩要任重推轂衿帶中流地殷江
漢南接衡巫風雲之路千里西通鄭鄧水陸之塗三七
是惟形勝閫外莫先建麾作牧明德攸在乃暴以秋陽
威以夏日澤無不漸蠓蟻之穴靡遺明無不察容光之
微必照由近而被遠自己而及物惠與八風俱翔德與
五材並運遠無不懷邇無不肅邑居不聞夜吠之犬牧
人不覩晨飲之羊譽表六條功最萬里還居近侍兼饗
戎秩候府寄隆儲端任顯東西兩晉茲選特難羊琇願

言而匪獲謝琰功高而後至升降二宮令績斯俟禁旅
尊嚴主器彌固禹穴神皋地埒分陝江左以來常邇斯
任東渚鉅海南望秦稽淵藪胥萃薈蒲攸在貨殖之民
千金比屋邪壘之內雲幄萬家刑政繁舛舊難詳一南
山羣盜未足云多渤海亂繩方斯易理公下車敷化風
動神行誠恕既孚鉤距靡用不待赭汙之權而姦渠必
翦無假里端之藉而惡子咸誅被以哀矜孚以信順南
陽葦杖未足比其仁潁川時雨無以豐其澤公攬轡升

車牧州典郡感達民祇非待期月老安少懷塗歌里詠
莫不歡若親戚芬若椒蘭麾旆每反行悲道泣攀車卧
轍之戀爭塗忘遠去思一借之情愈久彌結方城漢池
南顧莫重北指嶠潼平塗不過七百西接峽武關路曾
不盈千蠻陬夷徼重山萬里小則俘民略畜大則攻城
剽邑晉宋迄今有切民患烽鼓相望歲時不息椎埋穿
掘之黨阡陌成羣傲法侮吏之人曾莫禁禦累藩咸受
其弊歷政所不能裁加以戎羯窺窬伺我邊隙北風未

起馬首便以南向塞草未衰嚴城於焉早閉永明八載
疆場大駭天子乃心北眷聽朝不怡揚旆漢南非公莫
可於是驅馬原隰卷甲遄征威令首塗仁風載路軌躅
清晏車徒不擾牛酒日至壺漿塞陌失義犬羊其來久
矣徵賦嚴切唯利是求首鼠疆界災蠹彌廣公扇以廉
風孚以誠德盡任棠置水之情弘郭伋待期之信金如
粟而弗覩馬如羊而靡入雛雉必懷豚魚不棄由是傾
巢舉落望德如歸椎髻鑿首日拜門闕卉服滿塗夷歌

成韻禮義既敷威刑具舉強民獷俗反志遷情風塵不起囹圄寂寞富商野次宿秉停菑蜚蝗弗起豺虎遠跡北狄懼威關塞謐靜偵諜不敢東窺駝馬不敢南牧方欲振策燕趙席卷秦代陪龍駕於伊洛侍紫蓋於咸陽而邁疾彌留歛焉大漸耕夫釋耒桑婦下機參請門衢並走羣望維永明九年夏五月三十日辛酉薨春秋三十有七城府颯然庶僚如賈男女老幼大臨街衢接響傳聲不踰時而達於四境夷羣戎落幽遠必至望城拊

膺震動郛邑並求入奉靈櫬藩司抑而弗許雖鄧訓致
劈面之哀羊公深罷市之慕對而為言遠有慚德神駕
東還號送踰境奉觴奠以望靈仰蒼天而自訴震響成
雷盈塗咽水公臨危審正載貽話言楚囊之情惟幾而
彌固衛魚之心身亡而意結二宮軫慟遐邇同哀贈侍
中領衛將軍給鼓吹一部謚曰昭侯時皇上納麓在辰
登庸伊始允副朝端兼掌屯衛聞凶哀震感絕移時因
遣沈疴縣留氣序世祖日夜憂懷備盡寬譬勉膳禁哭

中使相望上雖外順皇旨內殷私痛獨居不御酒肉坐
卧泣涕霑衣若此移年癯瘠改貌天倫之愛振古莫儔
及俯膺天眷入纂絕業分命懿親台牧並建對繁弱以
流涕望曲阜而含悲改贈司徒因諡為郡王禮也惟公
少而英明長而弘潤風標秀舉清暉映世學徧書部特
善玄言輦悅之麗篆籀之則第六義於懷抱究八體於
毫端奕思之微秋儲無以競巧舊註言王之奕雖秋之儲精無以競其巧王伯
原云儲當亦取睽之妙流睇未足稱奇至公以奉上鳴
是善奕人

謙以接下撫僚庶盡盛德之容交士林忘公侯之貴虛
懷博納幽關洞開宴語談笑情瀾不竭譽滿天下德冠
生民蓋百代之儀表千年之領袖曾不慙留梁摧庵及
豈唯僑終蹇謝興謠輟相而已哉凡我僚舊均哀共戚
怨天德之無厚痛棠陰之不留思所以克播遺塵蔽之
穹壤乃刊石圖徽寄情銘頌其辭曰

天命玄鳥降而生商是開金運祚始玉筐三仁去國五
曜入房亦白其馬侯服周王本枝派別因萊命氏涉徐

而東義均梁徙自茲以降懷青拖紫崇基巖巖長瀾瀾
涵惟聖造物龍飛天步載鼎載革有除有布高皇赫矣
仰膺乾顧景皇蒸哉實啟洪祚喬嶽峻峙命世興賢應
期誕德絕後光前幾以成務覺在民先位非大寶爵乃
上天爰始濯纓清猷濬發升降文陛逶迤魏闕惠露霑
吳仁風扇越涉夏踰漢政成期月用簡必從日新為盛
在上哀矜臨下莊敬草木不天昆蟲得性我有芳蘭民
胥攸詠羣夷蠢蠢巖別嶂分傾山盡落其從如雲挈妻

荷子負戴成羣迴首請吏曾何足云昔聞天道仁罔不
遂彼蒼如何興山止簣四牡方馳六龍頓轡斯民曷仰
邦國殄悴齊隕晏平行哭致禮趙徂昌國列邦揮涕況
我君斯皇之介弟哀感徒庶慟興雲陞階毀留攢川汎
歸軸競羞野莫爭攀去轂遵渚號追臨波望哭無絕終
古惟蘭與菊塗由帝渚朱軒靡駕東首塋園即宮長夜
逝川無待黃金難化鐘石徒刊芳猷永謝

南史緬傳甚略并歷官亦多不載然大意皆同

桐栢山金庭館碑銘

沈約

夫生靈為貴有識斯同道天云及終天莫反故仙學之
秘上聖攸尊啟玉笈之幽文貽金壇之妙訣駐景濛谷
還光上枝吐吸烟霞變煉丹液出沒無方升降自己下
栖洞室上賓羣帝觀靈岳之驟啟見滄波之屢竭望玄
洲而駿驅指蓬山而永驚芝蓋三重駕螭龍之蜿蜒雲
車萬乘載旗旆之逶迤此蓋栖靈五嶽未暨夫三清者
也若夫上玄奧遠言象斯絕金簡玉字之書玄霜絳雪

之寶俗士所不能窺學徒不敢輕慕且禁誓嚴重志業
艱劬自非天稟上才未易可擬自惟凡劣識鑒鮮方徒
抱出俗之願而無致遠之力卑尚幽栖屏棄情累留愛
巖壑託分魚鳥塗愈遠而靡倦年既老而不衰高宗明
皇帝以上聖之德結宗玄之念忘其菲薄曲賜提引末
自夏汭固乞還山權憇汝南縣境固非息心之地聖主
纘歷復蒙繫維永泰元年方遂初願遂遠出天台定居
茲嶺所憩之山實惟桐栢實靈聖之下都五縣之餘地

仰出星河上參倒景高崖萬沓邃澗千迴因高建壇憑
巖考室飾降神之宇置朝禮之地桐栢所在厥號金庭
事曷靈圖因以名館聖上曲降幽情留信彌密置道士
十人用祈嘉祉約以不才首膺斯任永棄人羣竄景窮
麓結懇志於玄都望霜容於雲路仰宣國靈介茲景福
延吉祥於清廟納萬壽於神躬又願道無不懷澤無不
至幽荒屈膝戎貊稽顙息鼓輟烽守在海外因此自勉
兼遂微誠日久勤劬自強不已翹心屬念晚卧晨興餐

正陽於停午念孔神於中夜將三芝而延佇飛九丹而
晏息乘鳬輕舉留鳥忘歸以茲丹款表之玄極無曰在
上日鑒非遠銘石靈館以旌厥心其辭曰道無不在若
存若亡於惟上學理妙羣方用之日損言則非常儵焉
靈化羽衣霓裳九重嶢岵三山璀璨日為車馬芝成宮
觀虹旌拂月龍輶漸漢萬春方華千齡始旦伊余菲薄
竊慕隱淪尋師講道結友問津東採震澤西遊漢濱依
稀靈眷髣髴幽人帝明紹歷惟皇纂位屬心鼎湖脫屣

神器降命凡底仰祈靈秘瞻彼高山興言覆簣啟基桐
柏厥號金庭喬峰迴峭擘漢分星臨雲置琿駕岳開櫺
閶塗蹇產林麓蔥青誰謂應遠神道微密慶集宮闈祥
流罕畢其久如地其恒如日壽同南山與天無卒更生
變煉外示無功少君飛轉密與神通因資假力輕舉騰
空庶憑嘉誘永濟微躬

唐人天台山桐柏觀頌云天台也桐柏也代謂之天
台真謂之桐柏此兩者同體而異名又云桐柏山高

萬八千丈周旋八百里其山八重四面如一中有洞
天即石弼王王子晉之所處也是之謂不死之鄉養
真之境故立觀有初強名桐栢焉耳古觀荒廢故老
相傳云葛仙翁始居此地而後有道之士往往因之
壇址五六厥迹猶在

司空徐州刺史侯安都德政碑

徐陵

巖巖天柱大矣周山之峰桓桓地軸壯哉崑崙之阜三
光懸而不墜九土鎮以無疆承乾合德之君則天體元

之后所以並咨四鎮咸建五臣業配蒼祇功成寓縣至
于流名雅頌著美風詩年代悠然寂寥無紀其能繼茲
歌詠者司空侯使君乎自文昭武穆祚土開家濮水盛
其衣簪榮波分其緒秩仁義之道夷門美于大梁儒雅
之風司徒重于強漢自通人許劭託命于江湖高士袁
忠寄身于交越俱違建安之難獨處衡山之陽祖天資
秀傑世載雄豪卓富擬于公侯班佃必于旌鼓父光祿
大夫邑里開通德之門州鄉無抗禮之客自茫茫禹迹

赫赫宗周家滅驪戎國亡夷羿我高祖武皇帝迎河圖
于浪泊括地象于炎州南興涿鹿之師北問共工之罪
天生宰輔堯年致白虎之祥神賜英賢殷帝感蒼龍之
傑公亦觀時佇聖嘯咤風雲跪開黃石之書高詠玄池
之野沈吟梁甫自比管仲之才惆悵莘郊久負伊生之
歎自羯虜侵華羣蠻縱轍後舉桂部之地四戰五達之
郊郡境賢豪將謀禦難長者僉論推公主盟義士雄民
星羅霧集公既膺五聘方啟六韜率是驍徒仍開嶺嶠

自大討瀟湘同茲樊鄴下軍違命上策不宣敗我王師
受拘勅盜大陳格於文祖咸秩具神率土依風羣靈稟
朔公亦忠為令德天纂之謀吳帳斯開衛門無擁雖復
季孫還魯隨武濟河國慶民歡相儔匪若即授使持節
開府儀同三司丹陽尹昔光武不尤於馮異穆公深禮
於孟明終報王官之師遂舉咸陽之地斯乃聖主之宏
略而名臣之遠圖者焉皇帝以陶唐啟國致玉版于河
宗額頊承家佐金天子江水經綸草昧定鼎之業居多

締構權輿斷鼇之功相半固以英聲馳于海外信義感
于衆中主器攸歸當璧斯在公于是抗表長信清宮未
央從億兆以同心引公卿而定策馳輕軒于軫轡奉待
駕于中都七廟之基于焉永固萬邦之本由此克寧乃
復進司空公南徐州刺史于是鎮之以清靜安之以惠
和望杏敦耕瞻蒲勸穡室歌千耦家喜萬鍾陌上成陰
桑中可詠春鷗始嘯必具籠筐秋蟀載吟競鳴機杼或
肅拜靈祀躬瞻舞雩去駕擁於風塵還旌阻於飄沐京

坻歲積非勞楚堰之泉倉廩年豐無用秦渠之水雖復
東過小縣夏雨逐其輕輪南渡滄江秋濤弭其張蓋固
不得同年而語矣若夫聽採民訟昏曉必通名引軒櫺
躬親辨決立受符於前案無留詣於後曹接務高城之
中非異甘棠之下欣欣美俗濟濟都塵以賈琮郭頌之
風行建武永平之化於是州民散騎常侍王瑒等拜表
宮闕請揚茲美化樹彼高碑民欲天從允彰絲誥銘曰
鬱鬱三象茫茫九州綿天慘沴浹地虔劉赫矣高祖爰

清國讐元勲佐命力牧風侯亦既旋歸拜家有暉宮亭
蠡浦奮翅高飛電卷勅寇風行國威文身被髮作貢來
綏我皇纂武攀號東序謁渭同周迎門惟呂流矢為暴
撓搶斯舉喋喋蒼黎危危刀俎自我徂征妖氛克平爰
驅大珥實翦長鯨北震巢浦南俘灌城青羌卷介亦狄
迴兵蹈舞難踰歌謠靡宣曰我黎庶俱祈上玄山移兩
越海變三田公為上相復倍斯年

安都始興曲江人從陳武帝平侯景擒王僧辯有功

與周文育討王琳同被獲賄守者得還帝不罪武帝崩議奉文帝又為殺衡陽王昌進爵清遠郡公後以驕恣賜死按安都武夫未必有善政此文殆曲筆耳頌德政而及其被獲後人決無此事矣

隱居貞白先生陶君碑

蕭綸

夫夜光結綠非眩篋之恒珍逸羽翔鱗豈園池之近玩寧期心於遠大蓋不知其所以然也是以潁陽高蹈洗耳於唐朝漢陰貞栖滅迹於周代盛德風流有自來矣

應期而曜質者其在茲乎先生名弘景字通明本冀州平陽人也其先自帝堯陶唐氏之後胤堯治冀州平陽故因居止龍馬見五色之符欽明表八彩之瑞光宅於天下允釐於庶職洪源夙遠系緒綿長漢興陶舍為高祖右司馬子青翟位至丞相後至漢末南渡始居丹陽七世祖濬仕吳為鎮南將軍荊州刺史祖降宋南中郎參軍事父貞實司徒建安王國侍郎並立履清約博涉文史先生含元精之和氣蓄陵飈之雅姿兼宣七善總

脩九德行仁蹈義嶽峙淵渟牆仞無以覩清濁不能測
道風與星漢同高勝氣與烟霞共遠六歲便解書能屬
文七歲讀孝經毛詩論語數萬言曼倩幼習典墳公幹
少誦詩賦方之於古彼有多慙是以岐嶷流聲黃中著
稱有鄉人得葛洪神仙傳見淮南八公諸仙事乃歎曰
讀此書便使人有凌雲之氣於是寢興諷誦晨夜不輟
年二十七為宜都王侍讀總知管記事勝道求賢焚林
招士朝難其選是日得人阮瑀之書記不足扶衡孫楚

之才辭何以捧轂齊代好治宮室方脩苑囿青溪舊觀
更就起築仍奏表上頌辭事兼美邁彼樂職之篇踰乎
景福之製帝省覽久之益以為善除奉朝請恪居官次
夙夜惟寅春朝秋請是棧樸者也先生本不希榮常欲
辭退乃與親友書曰疇昔之意不願處人間年登四十
志畢山藪今三十六矣時不我借知幾其神乎無為自
苦明年遂拜表解職抽簪東都之外解組北山之陽同
稷丘之栖真慕留侯之却粒便具舟楫永言東邁朝廷

錫問時賢餞別祖以二疎招茲四皓超然輕舉異世同符爾乃杖策孤征游踐山嶽既而到予句容登於茅嶺以此地神仙之官府靈異之栖託往不能返遂卜居焉先生曰夫子云隱居以求其志行義以達其道吾聞其語未見其人我今義通無復其一請同求志之業故自稱隱居亦猶緝川之抱朴士安之玄晏倚巖栖隱依林遁跡交柯結宇刻徑為門懸崖對溜悲吟灌木深壑絕峭組織煙霞枕石漱流水禽無撓採藥耦耕野獸不亂

逍遙間曠放浪陵山嵒然若喪確乎難拔屬齊末道消
天命既否水闕穀洛地震由辰先生靜思冥數預識微
兆於是近遠書問悉皆杜絕昔乃聞之夏甫今則見之
先生我大梁休運應期受天明命三辰開朗四海寧謐
先生奉表稱慶於是信問復通天監以來常有勅旨供
給藥餌不乏歲時渥澤湛恩莫之與比先生七年暫游
南嶽茲山也譬閭風之地軸若崑陵之天鎮八桂傍臨
九純間設樹有琅玕草生車騎遺世獨往是用忘歸一

十年有勅遣左右司徒惠明徵還先生茅山別給廨宇
軒后之降精天老漢帝之致禮河宗況於茲日弗能尚
也養志山阿多歷年所攝生既善冥祥亦降猛獸不據
魑魅莫逢庭無荆棘遠同闕里階吐神泉運動闕於

是羽人徘徊仙客上下鸞鳳游集芝英豐潤大造佛像
爰及寫經起塔招僧備諸供養自誓道場受苦薩法夢
登七地又得嘉名具以啟聞蒙勅許可葛玄之夢見開
士朱鸞之遠望尊儀何以擬茲通感足此徵應以大同

三年歲次丙辰三月壬寅朔日癸丑告別年化春秋八十有一天子嗟惜儲皇軫悼有詔稱譽追贈中散大夫謚曰貞白先生禮也以其月十四日窆于丹陽郡句容縣雷平山若軒轅之塋衣冠如王喬之藏劍烏化於茲日可得偶焉先生器宇凝深思識精瞻含章貞吉不脩庶隅年將中壽匪踰於矩眉目疏朗儀貌鮮潔實亡勸沮多行德惠恡惜光景愛好墳籍篤志勵節白首彌至若乃淮南鴻寶之訣隴西地動之儀太乙遁甲之書九

章歷象之術幼女銀鈎之敏允南風角之妙太倉素問
之方中散琴操之法咸悉搜求莫不精詣爰及卞射荀
綦蘇卜管筮一見便曉皆不用心張華之博物馬鈞之
巧思劉向之知微葛洪之養性兼此數賢一人而已門
人桓法閻等慕遙風於緱氏繪遺像於橋陽勒玄碑而
相質騰絳霄之流芳乃為銘曰

留鳥表化棄劍凝神徘徊紫氣照耀丹鱗厥跡猶在餘
風可遵誰其嗣此淵哉淑人高行邁種盛德日新朗猶

懸鏡鬱似貞筠身以弘道行不違仁昔游纓綬頡頏縉紳厭乎匡救勞彼問津亦既解組乃襲山中遠尋丘壑高蹈風塵情無緬世隱不隔真結宇依巖貞棲茂草水玉留年華精却老乃有令問兼斯壽考泉過危庭峰臨窈洞露凝蘭階雲生桂棟日斜欄席花落窻甕尚平未反王孫不旋海桑交易陵谷貿遷豐碑有樹遺烈無騫梁邵陵王綸字世調武帝第六子少聰穎博學善屬文尤工尺牘坐事再削爵土後得復封拜郢州刺史

為西魏所攻見毅有集六卷

陝州弘農郡五張寺經藏碑

庾信

蓋聞如來說法萬萬恒沙菩薩轉輪生生世界豈直優
波提舍祇夜脩多而已哉是以熙連禪河質多羅樹七
處八會三清四說皮紙骨筆木葉山花象負之所未勝
龍藏之所不盡雖復銀函東度金甌南翻秦景遙傳竺
蘭私記譬猶得海水之一珠不下崑山之片玉若夫法
雲深藏師子雷音梵志往生聲聞說戒雪山羅漢之論

驚嶺菩提之法本無極際何可勝言弘農五張寺者南陽張元高寓居此地昔者千金之族見徙五陵大姓之民移家六郡蓋其流也元高五子負荷遺訓離經辨志並是成名入室生光咸能顯德加以尊承慧業敬受法門兄弟同居共捨為寺伽藍肇建即以五張為名是知城居趙信仍名趙信之城殿入蕭何即號蕭何之殿加以象馬無恠衣裘是捨春園柳路變入禪林蠶月桑津迴成定水平興雖盛豈可獨擅二龍扶風最良不得專

稱五馬寺主三藏大法師法映邑主洛州刺史張隆等
財法行檀身心罄竭兼化鄉邑道俗數千敬造一功德
輪見成三百餘部琅笈雲書金繩玉檢削蒸粟之簡裝
酸棗之珠並入香城咸封禪閣坐堂伏檻羌非湘水之
神綠房紫的足擬恭王之殿高掌西望長河北臨鼎氣
常浮爐烟咸起戶牖寥廓吹萬龍門之風梁棟崢嶸落
實河源之樹僧徒雲集不遠燉煌之城學侶相奔更合
華陰之市兩陝昔分實基王化二陵今阻翻馳羽檄虞

公屈產交亂風塵召伯甘棠凋零霜露雖復兼能共治
未遣渡河之獸烽析是警實擾移關之民是以法王御
世天人論道汲引四流周圍五怖故能調伏怨憎消除
結縛法水津梁得無砥柱之難香山轍迹非復終南之
險天子命我試守此邦墨突未黔孔席無暖纔臨都尉
之境即有樓船之役既而南風不競北道言旋幕府既
開邦君且止鄉俗耆老依然此別屬茲法事須余制文
聊以課虛為銘云爾

舍衛之國祇桓之園三明極地八會窮源連河競說勝
辨爭論波提東度祇夜南翻非空即色離相無言達人
止是獨悟重昏身雖繫馬心避騰猿禪棲却月義殿翔
鷗迴風香葢反露珠幡西臨砥柱東背轆轤河鳴陽硤
山嚮漢書響嚮通用蘇門翔禽歌轉流澗絃喧度河餘獸移關
舊村昔為畿服今成塞垣城疑廣武地似樓煩燿烽並
照象馬單奔無鍾襲宮有雨圍原不資十方誰釋三怨
風傾地柱火及天元銀鈎永固金牒長存封君馬首方

事南蕃言從楊僕請謝劉昆

周上柱國齊王憲神道碑

庾信

昔者軒皇受姓十有四人周室先封十有五國自爾承
基纂胄保姓受氏雖復千年一聖終是百世同宗故知
昔之東京既稱炎漢再受今之周歷即是鄴都中興公
諱憲字昆賀突恒州武川人也晉太康之世據有黃龍
魏孝昌之初奄荒玄菟太祖以百二諸侯三分天下函
谷先登鴻溝大定功業如此人臣以終公舍章天挺命

世誕生降太一之神下文昌之宿珠角擅奇山庭表德
儀範清冷風神軒舉聳動廊廟光華城闕未逾韶亂已
議論天下事人或曰是謂若木一枝旁蔭數國長河一
直自然千里風颭欲遠光景將昇後魏二年封涪城縣
開國公時年五歲也虹蜺滿野是廢當途之高鸞驚鳴
岐實始維新之命國家光宅受圖欽明秉厯大風初卷
長沙始封周元年進爵安城郡公倉邑二千戶仍授使
持節驃騎大將軍開府儀同三司開府同於馬駿秩擬

六卿驃騎等於劉蒼位高三事宗子維城彼多慙色武
成二年授使持節大將軍都督益壽寧等二十四州諸
軍事益州刺史改封齊國公食邑萬戶公時年十有六
王武子以上將開府未滿立年荀中郎為十州都督才
踰弱冠方之於公已為老矣加復營丘負海齊桓公受
賑之城岷山導江漢武帝求仙之地自非名陵孤竹聲
振沉黎豈得南至穆陵西登積石幸無白虎之患寧待
黃龍之盟卽祚畏威微盧仰德生為立廟刻石頌功成

都有文翁之祀非謂生前漢陽有諸葛之碑止論身後
比之今日豈可同年而語哉保定四年與大司馬蜀國
公圍金塘城師臨洛浦則廣武營奔兵上邙山則河橋
路斷八川風俗五方名利鐵市銅街風飛塵起天和元
年徵還行雍牧公以日月之明威神其政漆沮既從荆
岐即又少陽用事路不喘牛仲秋以殷民無驚水二年
拜大司馬仍理小冢宰營室殿軍器太監天官以邦國
為基是司六典夏官以兵戈為主專謀七德是以器械

填委既包吳漢之功宮殿崢嶸彌狀蕭何之法時以白露涼風務閑農隙督兵三萬出自宜陽拔伏龍之城平姚襄之壘馬陵削樹魏將路窮平陰聽烏齊師其遁天子冢弟禮絕羣公仁義所往事資道德建德元年進爵為王仍拜大冢宰姬旦封於曲阜不廢居中劉交國於彭陽無妨常從豈直周召二南並居師傅晉鄭兩國俱為卿士而已哉匈奴突於武川燿火通於瀚上公述職巡御治兵朔方馬邑星飛龍城月動撓留犁

出漢書匈奴傳一作

滿桃之酒經略不前失烟支之山下馬而去東隣逆命

非
反道敗德囚箕子於塞庫羈文王於玉門天子將有孟
津之師召公獨議公報以誕應天命克成厥勲昔者秦
昭起師於蜀直問張儀晉武用兵於吳惟謀羊祜於是
中軍無帥僉曰有歸五年拜上柱國元戎東討給王鐵
騎二萬先襲太原斗建麾兵天離轉戰虎嘯風騰雲飛
電掩林胡棗栗詎得充饑晉陽荻蒿何能拒防又加王
精兵六萬長圍晉州然後六軍星陳萬騎雷動中權始

及前茅已戰自爾即為前鋒橫行入鄴觀彼車絰槐本
馬驚旋濘積甲高昆陽之城尸封塞富平之水莫不如
彼建瓴同斯破竹一朝指揮六合大定是用光昭下武
翼亮中都足以據祖宗之宿憤解生民之怨讐方當待
彼石閭部斯玉鼓經緯天地光華日月既而赤烏夾日
黃熊入寢實沉無祀桑林不祭宣政元年六月二十八
日薨春秋三十有四季友之亡魯可知矣齊喪子雅姜
其危哉公器宇淹曠風神透遠璣鏡照臨山河容納置

罇待酌懸鍾聽叩聲動天下光照四隣武皇帝以介弟
懿親特垂愛友而密謀奇策加禮敬焉常謂左右曰孔
子云自吾有回門人日親其齊王之謂也用之作宰則
萬方協和用之撫軍則四表懾伏豈直舉繇為士國無
不仁隨會為卿民無羣盜愛翫書籍敦崇禮樂管絃入
耳則溪谷俱調文雅沿心則烟霞並韻養由百發落鴈
吟援應奉五行綈綳縹帙雍容舉止抑揚談論當世以
為楷模搢紳以為軌範則少有壯志頗校兵書玄水降

靈穀城授策飛風長柳月角星眉莫不吟誦在心撰成
於手所著兵法凡有五卷六韜九法不用吳起舊書三
令五申無勞孫武先誠可謂有忠孝焉有壯武焉不自
驕務謙光下物宋人獻玉不貪為寶百成子高守仁為
富不謂以信致欺為善非樂天年不享嗚呼哀哉以某
年月日塋于石安縣洪瀆川之里原隰悽愴埋於盛德
幾年丘陵搖落蘊於良才永矣乃為銘曰

悠哉朔方逝矣窮陰山連鳥道地盡龜林重黎業大伯

翳功深宵其積德必有君臨太祖撥亂喪君有君功迴
地軸策動天文猶臨赤水尚復黃雲諸侯八百天下三
分公之挺生實惟天假翠微神降文昌星下照于四國
充于兩社舟楫江河棟梁華夏水涌詞鋒風飛文雅純
深之性地極天經忠貞之道事感百靈君親惟一臣子
惟寧忠泉出井孝笋生庭乃宰天官為國之輔是居上
將為天之柱乃聖乃神惟文惟武策高開闢威移雲雨
九宮神略三術謨明天離轉陣月德迴兵黎陽水駭官

渡山驚冀州既載東原底平溟海欲運弱木將危中峰
岳斷半海鵬垂鳳沉丹穴龍亡黑陂臨淄廢市東武山
移千齡萬古英聲在斯

憲為宣帝所忌誣以逆殺之其子俱被誅此文皆諱
之不知此文作于何年其云季友之亡魯可知矣齊
喪子雅姜其危哉疑隋初時語也北史云憲死時年
四十此云三十四

周大將軍司馬裔碑

庾信

公諱喬字遵脣河內溫人也昔顓頊之命始則南正司
天重黎之後又以羲和掌厯夏陽適晉得隨會而同奔
東海避秦與毛公而俱隱其後金行受命玉笥南遷帝
系極於輿圖中朝至於江表曾祖楚之晉太傅錄尚書
揚州牧會稽文孝王之次子元顯之幼弟也元顯見害
之後桓玄篡逆之初爰自齟齬客身屠釣河內道左抱
劍長號代郡城前慟悲靈祭江淮志節之士汝頽風塵
之客感激一言咸多依附既而雲生伏龜星出鯨魚太

白經天蚩尤映野公乃收合餘燼泣血登陴臨武牢之
關據成皋之坂擁衆萬家歸於魏室魏明元皇帝遙授
平南大將軍荊州刺史襲封瑯琊郡王尚河内公主命
王承制從賓國之儀於時宋兵憑陵旗鼓侵逼虎牢不
封金墉無援魏太武皇帝授王使持節侍中安南大將
軍開府儀同三司給前後部鼓吹元戎啟行志雪冤恥
登壇慷慨三軍掩泣黃河漕粟已出石門仕馬連旗將
臨野坂既而雲中析起代郡烽燃反旆南轅途窮北略

贈征西大將軍都督梁益秦寧荆兗青豫郢洛十州諸
軍事揚州牧司徒諡貞王祖金龍封瑯琊鎮西大將軍
儀同三司吏部尚書贈司空諡康王父悅鎮南將軍豫
州刺史漁陽莊侯以荆河刺舉時值亂離釁起蕭牆遂
終非命公遺腹載誕流離寇逆復壁襁負深山擁樹程
嬰之匿趙武從役家臣王成之藏李變為傭酒市遭太
夫人憂苦草墳塋以終灰燼形骸毀瘠逾於喪禮年十
有五始幹家事楹前鑿柱即取遺書石上開松仍求故

劍出身司徒府參軍除中堅將軍員外散騎常侍值魏
室多難所在蜂起孟津以北無復封畿嵩山以南即為
鋒鏑公建議脩武立柵溫城函谷西封河橋北斷長亭
籍馬並入武城百里租車咸輸溫縣太祖文帝締構關
都經綸夷阻招攜以禮懷遠以德馬文淵之擇主去隴
坻而歸身實周公之入朝在河西而奉詔大統七年蒙
授平東將軍北徐州刺史十年河內故義四千餘家願
立忠誠須公衣錦乃授使持節領河內太守加前將軍

懷州拓境兩鎮奔波柳泉轉戰三城授首十三年太祖
召山東諸立義之將能率衆入關者有加重賞公率先
而至領戶千室即以為封固辭不受其菽粟之賜或以
指困馬牛之賞將同量谷朝廷以華陽西極漢水東流
歎孟達之奔兵惟劉封之失策魏前元年移鎮漢中除
白馬城主領華陽郡守昔稱導漾今聞上瀦烟沉火井
雨歇雲門其年授大都督加散騎常侍柱國蜀國公開
金牛之道通牧馬之關公卷甲北塞懸車來馬遂得策

預葭萌勲參綿竹封龍門縣開國子蒲州刺史仍領新
州尋授使持節車騎大將軍儀同三司大中正隆周授
圖天保大定以公才望仍為舊臣遂乃義深追遠恩隆
繼絕即改封瑯琊縣公邑五百戶仍遷驃騎大將軍開
府儀同三司都督巴州諸軍事巴州刺史武成二年被
勅赴援信州魚復道阻屢却岑彭荆門水急幾沈吳漢
公乃月峽先登瞿唐直上天子以公操履忠勤儀刑亮
直乃徵為大御伯尋轉大御正邑一千一百戶樞機近

侍出納絲言所謂多識舊章殿中無雙者矣四年大軍東討公所領義衆先守枳關授都督懷州諸軍事懷州刺史偃師張幕河陽牧馬雖接戰於富平已連營於官渡五年詔追還拜始州刺史更討信州賊山彰尋寶渝恃險峽路五尺絙釣纜通縣水三門橋飛齊渡既而風行草偃谷靜山空前後平十一城獲九千餘口馬歸平樂金輸水衡天和二年除信州刺史都督信州諸軍事朝發白帝暮宿江陵氣振巴丘之兵威警建平之戍五

年遷潼州刺史益州柱國公降帝子之重鎮天井之星
延閣擬於叢臺岷山方於代郡公仰稟雄謨參謀遠略
故得身預舞陽之功位極長平之寵六年授使持節大
將軍大都督西寧州諸軍事西寧州刺史方欲闢沫若
徼牂牁見夜郎之候習昆彌之戰而飛鳶墮水馬援去
而無歸金馬騁光王褒行而不反嗚呼哀哉七年正月
十日薨春秋六十有五詔贈使持節大將軍懷邵汾晉
州諸軍事懷州刺史夫人襄城公主魏獻帝之曾孫趙

穆王之季女王姬肅恭禴翟禮典四教兢莊三星令淑
有光隆慮之賢足表平陽之盛生則從夫以秩死則同
穴以禮建德元年八月十二日合葬於武功三時原大
夫墓樹以柏諸侯墳高於雉吁嗟滕公來居此里詔謚
定公禮也公資忠履孝蘊義懷仁直幹千尋澄波萬頃
逢蒙射法力牧兵書星晨高下之占風雨逢迎之氣故
得師出以律天幸將軍者也至如官曹案牘未常煩壅
戎馬交馳不妨餘裕足使四岳彌峻三台更明在朝四

十一年身經一百餘戰凡任四郡歷八州未嘗以貨殖
經懷去如始至渭南千畝之竹更懼盈滿池陽二頃之
田常思止足身歿之日家無餘財素車白馬狹室崎嶇
黃腸玄甲堦庭仄陋有詔冬官為營寢室朱邑祭酹無
所漢后是以賜金陳表妻子露立吳王為之開館嗚呼
哀哉世子侃孝家忠國揚名顯親是以勒此豐碑懼從
陵谷植之松柏不忍凋枯銘曰

欽若厯象平秩寅賓少梁奔華地入咸秦族夷興馬書

窮獲麟玉鏡云始金行乃構象浦通關龍沙開候上糝
石起河陽水鬪五馬南浮三星東宿太傳作牧庵有江
淹司徒避亂承制荆河南勞推轂猶思枕戈龍襍被野
蒼兕凌波莊侯季年禍機相接誕公遺嗣崎嶇懷挾山
竄趙武家藏李變伍員道阻燕丹路遥南奔楚塞北避
秦橋水流登隴寒風度遼有功都護則重嫖姚懷書上
馬習禮從戎陣圖六甲兵占八風藏松實劍射柳琬弓
推誠賈復屈節廉公八翼頻飛六條丞秉勇此仁義行

茲寬猛持印山開沈黎盜靜取甲無丘均田不井懋功
賜爵上將賞官軍中受詔塞外登壇方屠參合更鑿皋
蘭渝川毒水焚道災氛地亡都尉灘悲使君谷寒無日
山空足雲北風吹旒秋霖泣軍遣奠雙設銘旌兩布泌
水同墳平陽合墓悲哀嗣子攀號靡訴慟甚風枝悲深
霜露自此何世從斯幾年麒麟欲鬪華表中燃地形樓
起松心蓋圓茫茫丘壠代代英賢

胡孝轅云曾祖楚之贈征西大將軍北史作征南四

年大軍東討此保定四年也當脫保定二字天保二年除信州刺史周無天保年號當是天和之誤

益州縣竹縣武都山淨惠寺碑

王勃

原夫帝機寥廓雲雷驅妙有之功正氣洪荒清濁構乾元之象融而為川瀆結而為山岳五城韜海接崑閬於大都八洞藏雲冠瀛州於巨闕造化之所偃薄靈谷之所啟處極緹油而縱觀詠頌寧殫出宇宙而高尋風烟罕測是知玉卮無當遐荒非視聽之津金榜所存城闕

盡江湖之致何必九蚪齊驚直訪銀宮八駿長驅遇臨
石室武都山惠淨寺者梁大青年中之所建也名山列
岳之舊仙都福地之湊黃龍負匣著寶籍於經山紫鳳
銜書蔭榮光於井絡須彌山頂仍開梵帝之宮如意山
中即有經行之地爾其盤基跨險列嶂憑霄日月之所
竄伏烟霞之所枕倚飛泉瀑溜蕩滌崩崖綠樹玄藤網
羅丘壑飛塵作氣被萬吹於中巖帝琰司寒宅千霜於
北谷丹梯碧洞杳冥林岫之間桂廡松楹寂寞風塵之

表是稱英鎮實瞰崇岡閭閻當四會之街城邑辨三分之地綿磧錦瀆下侵重巒玉阜銅陵旁分絕磴山川絡繹崩騰宇宙之心原隰縱橫隱軫亭皋之勢頃以黃旗夜徙紫蓋晨傾九服失圖三靈在疚姦臣躍馬據折坂而吟雲壯士聞雞擁陽關而嘯雨岷峨失險化為鋒鏑之場江漢橫流非復朝宗之國墀宇由其覆没法衆是以凋淪國家奄有帝圖削平天豐紫宸反照皇階即敘萬國順百靈朝幽顯再立華戎一揆燭龍韜景避堯日

於幽都雲鵬斂翼候虞風於晏海以為軒階具美功窮
望祲之臺漢道兼弘力盡祈年之觀爰經寶地大啟祥
宮撫香象而高視鳴法螺而再唱龍垣淨土連帝道而
重光鶴苑崇基脫皇居而首出況乎山積舊壤下鎮偏
隅天帝遺墟上千躔次王舍城之宮闕白玉猶存給孤
獨之園林黃金尚在法物由其大備盛德所以相尋株
兵奉天藏之圖泉女獻山祇之籍離亭合榭因岸谷之
高低疊觀連房執岡巒之曲直丹崖反照畫拱相臨綠

嶂斜烟雕簾間出豐隆曉震次複雷而悽皇列缺晨奔
望崇軒而愕眙千香寶樹自起風烟九乳仙鍾獨鳴霜
雪銀龕佛影遙承鴈塔之花石壁經文下映龍宮之業
虹生北澗即掛新幡鳳下東岑還栖舊刹若乃尋曲岬
歷崇隈周行數里直上千仞蒼松蓄吹臨絕逕而疏寒
黛篠防烟繞迴疆而結蔭春巖橘柚影入山堂秋壑芙
蓉光浮水殿亦有山童採葛入丹竇而忘歸野老紆花
向青溪而不返山神獻果送出菴園天女持花來遊淨

國寶杳冥之秘訣託幽深之逸境豈直淮南桂樹暫得
仙家江左桃源終迷故老而已爰有寬闊梨者俗姓楊
氏其先華陰人也因官徙地家於縣竹山分太華水帶
長汾州岳會同風雲感召玄經素論侍郎居八俊之英
綠綬黃軒大尉列三台之首法師玉函降彩金瓶探色
振八解之遙源踐三明之廣路靈機入證窮象載於初
髻妙諦因心釋羊車於弱冠三千法界由廣位而出無
明十二因緣自普濟而登彼岸弘宣誓願大拯沉黎揮

覺劍而破邪山揚智燈而照昏室彌綸所被白馬盡於
禺同權漸所開黃牛至于嶠冢虔誠樂土憩影茲峰迺
以貞觀九年於寺西院立七佛堂一僧舍星毫動牖月
面分堦彩鳳御旒神龍負塔飛烟湧坐龕龕忉刹之天
杳霧成臺樹樹菩提之果朝散大夫行縣令清河張楚
親承妙業俯刊貞琰林宗有道伯喈無愧法師夙機少
晤應變多奇玉山中斷瓊林下雜支道林之好事語默
方融釋惠遠之高居風埃遂隔泊乎坐忘遺照返寂歸

真城肆颺然若空山黯而無色豈直巖枝泣血礪戶摧
梁而已哉縣令劉照彭城人也自礪山杖劍綰鳳歷於
雲臺春郊授鉞嗣龍圖於白水玉壘三分之胄下維公
門金陵一霸之基旁參帝緒翠綵丹紱歷今古而先鳴
人傑地靈冠山川而得雋君膺岳瀆之秀挺風雲之會
昆溪劍鏑直照胸於疑楚澤珪璋潛周履行魯恭明德
方昇漢輔之階潘岳能文且職河陽之縣仁徽可被闔
境仰其風猷威德所加百城疊其霜彩尚迺康莊妙域

光開不捨之壇舟楫愛河昭暢無生之業痛驚林之殄
瘁悲象教之榛蕪爰命緝興式光泉藪武蹊龍澗近分
廬岳之圖金闕瑤臺更討瀛洲之記銘曰

武都仙鎮靈墟粵域邑動香城山開淨國澗流百道峰
雲五色谷暗藤斜山高樹逼千楣鶴列萬拱星懸分林
構趾接磴開屢臨階竹樹遶棟風烟龕前惟石塔下秋
泉綠崖疏逕青岑拒室霧道相縈烟房互出葉濃磴淨
花深嶂密鳥度難尋猿驚易失簷分石竇地絡金沙丹

丘抗月碧洞棲霞松開野路桂列仙家仙鑪栢葉寶座
蓮花砌因巖曲橋隨峰返果出天厨香來仙苑玉鑄疑
啟曙金鐺照晚谷思鍾張山悲鐸遠閭閻踐勝銅墨高
情聲飛別邑望動專城懸金道肆刻石山楹千載之後
予嗟令名

益州德陽縣善寂寺碑

王勃

若夫玉繩高曜分寶歷於皇階金榜洞開導璫暉於帝
幄雖復蒼梧北望湖亞疑盈舜后之歌綠荇西浮江漢

積文妃之頌未有激揚煩蔭栖妙果於香城揮發蓋纏
樹冥基於淨域則紫房丹室猶居燬室之間朱紱瑤筐
未出塵籠之際我國家鳳翔元氣駕黃幄而層飛龍躍
太虛絕蒼根而止僚文皇帝以八才御厯光昇代野之
榮文德后以十亂乘時恭贊塗山之業握仁王之寶鏡
日月重光驅梵帝之金輪雷霆靜祲涅槃甘露承眷而
宵流般若靈音雜祥以晝引蛟臺蜃閣俄交震旦之墟
月面星毫坐照毘邪之國善寂者蓋舊寺之餘趾梁武

帝之所建也爾其碧鷄仙宇分絕障於金堤石兔遙源
控長江於玉峽封畿四會龍洞舍衛之壇里閉三分鹿
野徑行之地洎蒼鵠上擊銅馬交馳祇園興版蕩之悲
沙界積淪胥之痛火炎崑岳高臺與鴈塔俱平水浸天
街曲岸與猴池共盡山川隱嶙空傳鷲嶺之基灌莽蕭條
非復鷲林之樹武德伊始君子道亨正皇極而撫衆中
登太階而臨天下函闕雲物更逢真聖之期井絡星辰
重集會昌之運雖開基撥亂獄訟知歸而繼絕興亡經

綸未暇先皇帝統業貞觀仰

疑

宸奉文物於三天布聲

名於十地參羅上下充橐籥於襟懷八部神祇薦圖書

於掌握皇寶降地花昇含生無昏墊之虞法衆有來蘇

之望俄而往

疑

庭構腐椒房穆卜六宮震恐三靈愕眙

馳瑤展幣有聲於羣宗碧荊玄針無徵於衆術帝迺降

監迴慮屏壁與珠追勝迹於靈闕事良緣於福地爰紆

聖綍重啟禪宮峙璇刹於將傾鎮

一作領

銀繩於已絕絲

綸既洽棟宇行周坤德用寧陰儀載朗於是林衡授矩

周官詮揆日之工梓匠揮斤荆客練成風之巧重楹畫
拱坐出天霄複樹文閨俛臨電宇顯慶中縣令蕭君道
弘理鈎繩於日用憑藻績於天成仙官之妙匠可尋盧
舍之神模不墜凋落鶴翥洩珠網於星津綉桷蚪伸吐
璿璫於月徑綠房丹鎖彩綴晴霞紫閣青疏光含薄霧
春風瓊樹香飄席上之蘭秋水銀塘影數軒中之芰晨
光轉卉翻寶宇之龍花溽露低枝蕩真文於貝葉天童
潤色黃珉碧玉之壇海聖彌縫師子龍王之會建靈幢

於厚夜珠飾年深懸法鼓于迷津規模歲遠時又於佛
堂東壁畫二聖僧丹青未畢大啟神光隣玉塵之崇輝
發金龕之實相朱軒夕朗似遊明月之宮紺宇晨融若
對流霞之闕由是岷英蜀秀攀講序以雲趨帶驚裾驚
仰齋庭而霧合貪機大阻淨施旁流綺羅分解珮之因
軒益得捐金之所靈妃翳日捨翠幄於香筵仙客停雲
落霓裳於寶地自非冲姿密契景應潛周豈能照義祉
於氤氲動玄機於肸蠁者也爰有上座弘一節並沉研

符隱括仁棠凝妙律於神珠肅靈椒於寶印大昊奉機
截若海而橫流風伯扶輪歷邪山而效駕騰燭龍於惠
炬俯鏡重昏奏鳴鳳於天歌下清羣籟摩珍在握遙臨
七寶之宮正覺為心俯闢三乘之路湛衢鐔於忍地品
藻雞園推水砥於言河扶持象化縣令宇文某河南人
也帝隋尚書之元孫皇唐侍中之令子爾其虹旗萬里
御六氣而鵬翮霜戟千羣擁三州而鸛視帝葉皇枝之
重對越乾坤金滕石匱之功光華宇宙公上流提慶中

和毓祉見鍾鼎於南鄰奉軒裳於北闕雲姿月步下瑤
澤而追風雪羽霞臨歷珠田而矯霧芳蘭公子即以地
業高人幽桂王孫即以琴樽待物敘微猷於禮樂則組
豆縱橫談賞契於林泉則烟霞咫尺自裁聲百里揆化
雙川收武城之故事擇中年之令典仁風易狎候丹籀
於春暘惠化難經佇青鸞於曉墜疑山巨源之遠量嘯
傲行藏謝太傅之高風從容語默縣丞王敬衣簪舊族
孝友名家白虹絨抵鵲之光紫電蓄衝牛之氣七年高

秀拂曾漢以非遥六月雄圖繫長波而未遠鄉堅等少
承榮緒中區勝族門稱東別之標地接西隅之嚮嚴君
平之履道盛德家傳秦子整之談天風流代襲咸以為
妙圖真諦事出於無名翠琰玄碑道凝於不朽弇州北
跨猶疏駮驥之名文石東區尚勒元龜之頌沉乎玉衣
流慶事屬於仙幃金屋延祥福纏於梵宇爰求勝筆載
記芳謠下官弱植少徒薄游多暇薜蘿人事空餘江海
之心筆札神交尚有淵雲之氣相如謝病訪詩酒於臨

印立也棲遲聽絃歌於單父羣公以道之存矣思傳記
德之書下官以文在茲乎願展當仁之筆其詞曰

蜀蒞

疑

東漸岷山西積月峽星橋勝金孕碧胎蠻靈兆

丘墟梵迹鴈塔推基

闕

肅肅黃運英英文母配乾垂

慶儀坤握矩寵照香城仁沾淨土爰光大壯聿求多祚
青牛福地白鶴禪林重扃霧敞複殿雲深龕雕翠玉剎
樹黃金龜鏡夕照鳳鐸晨吟蕙樓彌堅化臺出沒棟列
長虹窻栖明月果脣周暎蓮眸間發雨霽猴池烟生龍

窟肅穆禪衆優游令宰方駕康衢連舟性海驚岳增飾
鷄林潤彩藻繪相尋丹青盡在我今懷矣窮路何長疑
承風詠德展義陳詞百年心事千載風期東西南北栖
遑幾時

唐恒州刺史建昌公王公神道碑

楊炯

王氏之先代為佐命秦之霸也則王離滅楚國而三將
連衡漢之興也則王陵誅項籍而五侯同拜南陽定命
應圖識而作司空西晉聿興合訶謠而濟天下昔者伊

尹伊陟但保乂於商朝太公桓公唯夾輔於周室蕭何
之後居食祿而無聞鄧禹之孫在當塗而不嗣未有夏
殷三統金木五遷冊命重光軒裳代襲則我瑯琊之郡
有冠蓋之里乎建昌之縣有公侯之子乎公諱義童字
元稚其先瑯琊臨沂人也永嘉之末徙於江外皇運之
始遷於五陵今為雍州萬年人也祖僧興齊會稽令梁
安郡守南安縣開國侯祿位千石珪符五等營室迴於
羽儀山河入於盟誓父方賒梁正閣主簿伏波將軍梁

安郡守隋上儀同三司以惠和之性有文武之才伏波
將軍從征等於馬援儀同三司開府均於鄧騭家餘積
慶郡不乏賢代臨本州則元賓之父喜形於色繼為本
守則張翕之子迎者如雲自齊國遜位於梁庭及隋人
內禪於皇室夏禹之鼎寶命集於周朝御龍之家世祿
歸於范氏公台階茂緒昂宿精靈五百歲之賢才一千
里之皇佐忠規武節學府詞林元方閨門敬其有德少
游鄉里稱其善人實惟清廟之器是曰皇家之寶韻諧

金石奏虞庭之八音德合珪璋列塗山之萬國黃河一曲之水莫測其源赤城千丈之巖未階其峻羣童忽聚綴帛而引旂旗父老相呼授履而傳兵法隋授左勲衛率非其好也漢東離拆海內風塵天子溺於膠船諸侯問於金鼎能扶天下之危者必據天下之安能除天下之憂者必享天下之樂我高祖神堯皇帝就之如日望之如雲發三河之雷霆平四時之厯象武王之仗黃鉞一月臨於孟津高帝之執朱旗五星會於東井公瞻烏

于屋射隼於墉陳平則間行而去楚酈生則長揖而歸
漢奉符繫組觀軹道之降王偃武脩文見山陽之散馬
初拜車騎將軍稍遷右屯衛將軍錄有功也考於周典
崇德報功稽於春秋策勲舍爵車騎萬隊備涼土之羌
戎衛軍十兵掌京師之屯禁于時天下初定邊方未輯
二十八舍尚有吳越之妖氛一十三州猶積東南之殺
氣武德四年詔公為江南道招尉使鼓瑟而送受命而
行乘使者之輜車掌行人之旌節陸賈至於南海先責

尉佗隨何入於九江即徵黥布詔除泉州都督封建昌
縣男食邑三百戶斗牛星象舜禹精靈境接東甌地隣
南越言其實利則璫瑁珠璣叙其風俗則丹雘白犬公
門容駟馬位列三刀防薏苡之譏嫌絕簡書之流謗豈
直廣州清節約貪泉於石門合浦神君返明珠於漲海
貞觀三年詔除散騎常侍行果州刺史授期天帝肇跡
人皇南充國之舊都西巖渠之古邑岡巒紛糾天彭雙
闕而作門珠貝浮沉巴水三迴而成字公入參師友出

居方伯金蟬右貂朱旗曲蓋纔臨蜀郡即聞來暮之謠
初踐益州已聽中和之樂七年詔遷銀青光祿大夫行
恒州刺史西街畢昴北岳恒山天開太一之官地列并
州之鎮境分靈壽魏將樂羊之所封邑對行唐趙王惠
文之所築公政成朞月風行萬里鄧晨一郡漢帝稱為
主人李廣數年匈奴號為飛將行嘗計日郭伋不負於
童兒郡異中平王觀無私於任子既導德而齊禮亦勝
殘而去殺三木在殿將拜鄭弘兩鴈隨車坐悲虞國享

年若干以十五年冬十一月二十五日薨於洛陽之清化里公家傳將相世有忠貞屬離亂之弘多值風雷之草昧河宗兩日負鼎而謁成湯渭水七年垂釣而逢西伯將軍再命刺史三遷仲髡樂巴牧人之良翰龐參虞詡將帥之宏規立事於當年揚名於後代兄國印穀州刺史弟國稀仁州刺史荆枝擢秀棣萼生光何止平輿之二龍是為賈家之三虎唐虞之際四岳分居趙魏之間八男為郡公雖勲參締構位總班條金友玉昆良田

廣宅而能吐食下士倒屣迎賓無笑客之美人有拜賓之童隸策名委質善始令終生當封侯克成丈夫之志死而可作無忘事君之道越十六年二月二日塋于伊闕縣之萬安山詔賜雜物百段給儀仗往還禮也亭連長樂城枕高都守闕塞者汝寬適伊川者辛有北瞻洛汭尚想元凱之境東望邢山依然國僑之基夫人楊翟縣君河南褚氏即太常卿楊翟康侯亮之女中書令河南郡公遂良之妹也宋公子之流派褚先生之苗裔弘

夫人之禮傳淑女之詩有文在手歸於魯國有鳳和鳴
適於陳氏邑之石窳縣以封丘夫尊於朝妻貴於室仙
人暫別初悲寡鶴之聲寶劍纔分終合雙龍之氣以某
年月日薨於某所越某年月日祔建昌公之舊兆長子
師本太穆神皇后挽襲即建昌公歷韓王府祭酒岐州
司士參軍定州安喜縣令譽聞州里學富丘山以卿子
而為郎以象賢而開國朝遊楚澤暮宿燕宮東臨石柱
雍為積高之地右會長星唐是中山之邑出遊隣國不

以陪臣見朝上謁邦君不以屬官相待洛陽朝覲適見
雙鳬東都暮田行悲駟馬以年月日終於某所越某年
月日即陪塋於先兆次子師表左千牛備身遷尚輦直
長歷許州臨潁博州堂邑滄州樂陵縣州萬安果州西
充五縣令能傳祖業克嗣家聲有言偃之文章兼仲由
之政事晨陪紫極繞鈎陳之六星旦奉黃麾屯玉車之
千乘至若繁昌土宇魏文帝之殫壇堂邑隄封漢陳嬰
之侯國河分九道渤海東臨江派五津崑崙北指莫不

愛人以禮為政以德鍾離意之禁暴不用尺刀公孫述
之有神能持五縣次子師玄雋州都督府臺徵縣丞次
子師楚夔州都督府雲安縣令芝蘭有秀羔鴈成行滇
北數十尹莫大邛都之縣邑東七百里唯有巫山之峽
言其縣職黃龍入於闕門叙其宰人鸞鳥翔於學舍咸
能生盡其孝喪盡其哀積粟萬鍾思負米而何得棖題
三尺泣吾親而不見卜其宅兆麟鳳匝其岡巒陳其簋
簋春秋變其霜露思傳舊德式建豐碑戴安道作頌於

鄭玄蔡伯喈披文於郭泰魏武王讀而稱妙非所望焉
夏侯湛見而陋之固其宜也銘曰

厥初兮后稷導生人兮知稼穡降及文王精翼日兮衣
青光平東遷兮郊廓晉上賓兮帝鄉秦三將兮繼代漢
五侯兮克昌比琅山兮峻極等淮水兮靈長惟祖考兮
鼎盛佩金璋兮疊映彼山川兮降靈生玉樹兮青青成
張良兮昴宿乘傳說兮箕星出忠兮入孝武緯兮文經
陳嘉謨兮制千里摘藻思兮挾天庭有隋兮喪亂土崩

兮瓦散皇運兮權與人神兮攸贊值笙鏞兮變響屬天
地兮貞觀河兩日兮事殷井五星兮歸漢帶長劍兮曄
曄擁幡旌兮照爛周命兮惟新雲雷兮尚屯控東南兮
荒景負江海兮未賓陳禮樂兮命使動輜車兮麟麟用
蛇符兮澤國頒武節兮山人專一方兮革面重九譯兮
稱臣天垂兮星紀地連兮交趾山草樹兮潛移蜃樓臺
兮鬱起遷合浦兮太守為廣州兮刺史臨漲海兮明珠
飲石門兮貪水碕冲天兮八翼代出身兮萬里金蜀兮

興區枕印笮兮倚巴渝有靈臺兮古跡有充國兮舊都
豐貂兮左珥介士兮前驅濟三刀兮持節昌兩日兮剖
符降鳴鳩兮大夏騁神馬兮長衢畢昂兮分野蘭堂兮
四下漢皇帝兮國都耿將軍兮壇社若恒山兮詔鄧猶
朔方兮命賈李北平兮漢飛郭并州兮竹馬瞻太階兮
坐躡惜天年兮不假伊天姓兮潁川有美人兮嬋媛桂
生兮因地女嫁兮因天見乘龍兮奕奕覩飛鳳兮翩翩
知遽瑗兮有禮笑虞丘兮未賢始銜悲兮晝哭終共盡

兮千年卜龜謀兮習吉陳旨酒兮嘉粟車徒儼兮在門
旌旆紛兮竟術循洛橋兮南渡從國門兮右出樹蕭蕭
兮有風雲慘慘兮無日指丘陵兮一閉與天地兮相畢
悲孝子兮純深孰憂思兮可任訴高天兮泣血躋厚地
兮崩心樹碑兮神道無媿兮詞林歷陽之都兮水沒圓
嶠之海兮山沉俾外孫兮幼婦生白玉兮黃金

唐故中書令梁國公姚文貞公神道碑銘

張說

叙曰八柱承天高明之位定四時成歲亭育之功存畫

為九州禹也堯享鴻名播時百穀棄也舜稱至德由此
言之知人則哲非賢罔入致君堯舜何代無人有唐元
宰曰梁文貞公者位為帝之四輔才為國之六翮言為
代之軌物行為人之師表蓋維嶽降神應時間出者也
公諱崇字元之姚姓有虞之後遠自吳興近徙于陝今
家洛陽焉烈考長沙文獻公樹勲王室建撫舊府公紉
綺而孤克廣前業激昂成學榮問日流武庫則矛戟森
然文房則禮樂盡在弱冠補孝敬挽郎又制舉高第歷

佐漢鄭並有聲華入為司刑丞天授之際獄吏峻密公持法無頗全活者衆進夏官員外郎郎中侍郎朝廷曰能遂掌軍國遷鳳閣侍郎監脩國史兼相王府長史始則天人讓王承置醴之顧終以飛龍利見延驂乘之恩自時厥後恒當大任凡三處兵部尚書三入中書令一為禮部尚書左庶子又肅政大夫總靈武軍兵馬又司僕卿知隴右監牧出典毫宋常越許申徐潞楊同十郡景雲初以藩邸舊僚封梁國公食賦百室公性仁恕行

簡易虛懷汎愛而涇渭不雜真率徑盡而應變無窮常
推是心以御於物故所蒞必毗庶風偃驚狼化從言不
勵而教成政不威而事理去思覩頌來暮聞歌既登邦
政卒乘輯睦及在宗伯神人允諧今之中書是為理本
謀事兼於百揆論道總於三台公執國之鈞金玉王度
大渾順序休徵來臻懋德格天名遂身遜拜開府儀同
三司崇其秩逸其志也初太夫人在堂公受職西掖頗
限局禁求侍晨昏優詔既許尋令還職公固請以泣制

曰家有令弟足慰母心國有棟臣安可斲闕其後剖符
江表敦諭起復衰麻外墨藥棘內毀變禮中權誠識所
貴神龍之首預聞興復疇其井賦累讓而停夫以革故
鼎新大來小往得喪而不形於色進退而不失其正者
鮮矣君子曰忠不忘親仁也哀不違事義也讓功辭邑
禮也濟代全名智也仁以長人義以和下禮以安上智
以周身宜其光輔四帝軒冕三紀池臺琴筑優游暮齒
傳爵土於祚胤保祿位於終始矣享年七十有一開元

九年九月寢疾薨于東都慈惠里皇上悼焉國人慕焉
撫牀輟春曾未云比制贈揚州大都督謚曰文貞禮也
十年二月塋於萬安山之南原在疾也王人賜膳御醫
視藥于薨也中使弔臨羽儀哀送君臣之義厚莫重焉
子异子爽思綴遺美以寘罔極有詔掌文之官叙事盛
德之老銘功將以寵宗臣揚英烈帝乃灑恩仙翰鏤澤
豐砥日月臨照於佳城烟雲變態於神道實其文字別
為羣玉之山禁其樵蘇即表三司之墓銘曰

源深自虞派別從吳避地魯陝居家洛都神明遠契嶽
瀆冥符翊聖斯偶生賢不孤仁將勇濟孝與忠俱學及
攢植文鋒迅驅纔安卑位即騁長途惟實惟有若虛若
無再三軍國一二訐謔戎柄尤重王綸最樞兼司任切
久政榮殊黼藻彌煥丹青靡渝以寬容物以鑑分區外
或形放中恒禮拘箴雖誠口諍亦忘軀但覩渾璞誰詳
瑾瑜伊皋尺寸管樂錙銖名正身遂言誠願孚方辭漢
祿更辱齊組既積而散窮歡盡娛川歸東極日去西晡

上惻旒宸旁悲路衢藍田美玉荔浦明珠載廣休慶爰
弘典謨豐碑迺立盛業其鋪帝念頻軫仙毫特紆錫金
刻石鳳篆龍圖七耀光動三泉澤濡銓能叙事理鬱詞
敷求舊銘實慙殫恧蕪緬思雲霧尚想江湖有道之德
其何以踰延陵之墓空此嗚呼存歿終始遐哉邈乎

小說載姚崇與張說有隙崇病戒諸子吾沒後張必
來弔汝具陳吾生平服玩張若不顧汝家族無類矣
若顧當錄致之仍以神道碑為請既獲其文登時錄

進先礮石以待至便鐫刻崇卒悉如其言不數日文
成敍致該詳時謂極筆數日果遣使取本欲加刪改
姚氏諸子引視碑仍告以奏御使者復命張悔恨曰
死姚崇能算生張說吾今日方知才之不及遠矣按
姚崇以開元九年九月丁未卒于東都時張說在并州
九月癸亥說進兵部尚書同中書門下三品時帝在
長安說亦應至長安明年二月帝至東都則崇已塋
矣未塋以前說無由赴弔既塋而弔去崇死已半年

說在帝左右已三四月不應久不脩隙至碑文既成而後悔之也唐書通鑑俱不取此極有見

冠軍大將軍郭知運神道碑

張說

四叙平分清秋之氣勁五方異俗崆峒之人武故隴上多豪山西出將其有雲龍感召星象特生金鼓登壇隱如敵國麾幢指塞自比長城得之於太原公矣公諱知運字逢時其先太原著姓今則晉昌人也本乎文武之弟是為號叔號或云郭因而氏焉自燕昭尊隗以築宮

漢祖封亭以列國其侯子陽曲宅彼太原舊矣亭之玄
孫友從太原徙隴西昭帝分隴西置平郭氏又為郡之
右族友之昆孫武威太守憲憲之猶子散騎常侍芝其
有名迹見於魏晉則晉昌諸宗散騎之後也爾乃一門
連譽時人號曰三儒四海名齊天下謂之八顧光祿派
分於馮翊廷尉世茂於潁川孝則天錫釜金忠則帝章
冕服仁則猛獸不害信則童兒不欺豈但介休見有道
之碑洛陽聞立德之傳而已曾祖欽瓜州大黃府統軍

上柱國祖才朝議郎瓜州常樂縣令上柱國父師朝散
大夫上柱國贈伊州刺史磧鹵之地戎馬生郊業戰鬥
而弘勲仕州縣而為達啟莫京之繇福不在於其身積
無聲之善慶必流於後嗣公太白之精雷泉之靈膺家
之禎為國而生身長七尺力能扛鼎猿臂虎口虬鬚鶚
瞬射穿九札劍敵萬人子卿路逢遙識將軍之相唐舉
一見足辨封侯之骨解褐以善戰授昭武校尉秦州三
度府左果毅以敗狄北庭加游擊將軍沙州龍勒府折

衝兼右金吾郎將瀚海軍副使尋改朝散大夫伊州長史伊吾副使以軍累破虜即授其州刺史進當軍經略使朝廷以未愜前除且有後命遷本衛中郎將仍舊為州軍使默啜之寇北庭也公奔命解圍軍聲大振加雲麾將軍右府衛將軍封介休縣開國公食邑二千戶開元二年吐蕃入隴右掠宕牧公兵以奇勝寇不復蹤積甲山齊而有餘牧馬谷量而未盡歸功廟筭朝議多之授羽林將軍持節隴西諸州節度大使兼鄯州都督河

源軍使鎮西陲信國之藩屏坐北洛亦王之爪牙故入
奉期門而出寄分閫於是料敵無備間其師老潛軍一
舉大俘九曲鎖甲文劍焚馬犂牛既獻戎捷遂頒朝賜
乃兼鴻臚卿攝御史中丞改封太原郡開國公加前食
邑三千戶執憲總軍典屬乘障增爵益邑遇厚恩深俄
而六州羣胡相率大叛命公統隴右之騎濟河曲之師
鋒鏑爭先玉石俱碎拜左武衛大將軍授一子官賜金
銀器百事雜綵千段班師臨洮遺茲虐疾嗟呼匈奴未

滅宿志不申生也有涯死而猶視開元九年十月二十
二日薨於軍舍春秋五十有五蕃夷邊鎮血面椎心悲
慘風雲號慟山谷豈非良將視人如子人亦視猶父乎
皇帝閔焉詔贈京州都督米粟五百石錦帛五百段命
都水使者張景佚備物護塋遵朝典也惟公氣猛而性
和量寬而精銳沉謀可以掩著蔡雄斷可以奪鬼神故
常糟粕韜鈴芻狗風角然其樹恩結信立威用武烜赫
如風濤震蕩如雷雨戰必克攻必取每有奏謁帝特稱

歎孝文之得魏尚虜不足憂太祖之見郭嘉知成吾事
前後錫錦衣寶帶文馬素女嬋其盈門長鳴在廐感知
己之主陳必死之力皇情西顧則九羌疊鼓詔書北伐
則六狄焚旗上成聖君之玄鑒下効武臣之素節其竟
也如此夫為人子立廟致敬祖考來格不亦孝乎為人
臣恢疆禦侮以勞定國不亦忠乎若然者歸義方於先
人揚令名於後代可也嗣子英傑起復定遠將軍左領
軍衛翊府中郎將偕紫服金章河西節度副大使英奇

朝散大夫前尚輦奉御英協游擊將軍前京兆勵行府
右果毅都尉英彥朝議郎前左衛胄曹參軍等咸善居
喪而過哀或從王事而奪禮則知辛賢父子繼位將軍
祭彤兄弟並參戎律去本不戀達也而新是謀權也嘉
此武功創其宅兆以十月七月塋我公太原夫人燉煌
索氏祔焉禮也皇上念功以惜逝厚終以遇存有詔詞
人為其碑誌介士送塋即封征虜之墳單于入朝當祭
度遼之墓銘曰

沈沈將軍雄略冠羣平西征北震戎懾獫亭障卧鼓屯
田饋軍仗此白刃致彼青雲郭侯讌喜既多受社玄牡
黼衣清廟蠲祀鼎食金奏炮鼈繪鯉既來不庭有嚴天
子流沙博望羽林飛騎河曲迴兵臨洮舊防手握金節
魂沉玉帳千里送喪三軍悽愴詔塋禮崇恩碑義豐生
為神將死為鬼雄身世一滅榮華萬空祁連之墓長旌
武功

唐書本傳知運二子英傑英人此文有三子而無人

歐公集古錄亦疑此碑為燕公奉詔撰定不誤或即
奇彥改名耳英人代宗時貴幸為父請謚初議曰威
為崔厦所駁改曰恭而唐書作謚威恐史書亦未可
盡信

撥川郡王神道碑

張說

珠玉無遠而登輦輅之飾寶也松栢無幽而入殿堂之
構材也物貴其用人亦如之撥川王論弓仁者源出於
足末城吐蕃贊普之王族也曾祖贊祖尊父陵代相蕃

國號為東贊戎言謂宰曰論因而氏焉公有由余之深
識日碑之先見陋偏荒之韋毳慕上國之衣冠聖歷二
年以所統吐渾七千帳歸於我是歲吐蕃大下公勒兵
境上縱謀招之其吐渾以論家世恩又曰仁人東矣從
之者七千人朝家大勲授左玉鈐衛將軍封酒泉郡開
國公食邑二千戶國語曰大戎樹敦國語作惇守終純固今
其俗獷而輕死其法折而不撓故前代無降人中國無
童僕自公之拔身向化首變華風澤潞之間始見我州

矣若夫河南胡苑坰牧所利每歲冰合虜騎是虞中軍
必謀於元老亞將固選於時傑神龍三年以為朔方軍
前鋒遊奕使景雲二年換右驍衛將軍開元五年兼歸
德州都督使皆如故八年遷本衛大將軍改朔方節度
副大使公之理兵也堅三甲利五双偶拳勇齊足力信
賞罰分甘苦六轡如手千夫一心接獠獫猶蚊蚋卧沙
塞猶衽席存居露食垂二十年雨畢而成師冰泮而休
卒寒氣入於肌骨夜霜入於鬚鬢人不堪其勤公不改

其節韓公之建三城也公洗兵諾真之水刷馬草心之
山以為外斥而叛徒安堵鄭卿之和默啜也公授館李
陵之臺致饗光祿之塞以為內侯而賓至如歸九姓之
亂單于也公四月度磧過白樺林收火拔部帳納多真
種落彌川滿野懷惠忘亡漠南諸軍避其計也降戶之
叛河曲也公千騎奮擊萬虜奔走戡剪略定師旅方旋
而延陀跌跌復相嘯聚上軍敗於青岡嶺元帥沒於赤
柳澗公越自新堡奔命寇塲羸糧之徒不滿五百兇醜

四合衆寡萬倍公殺牛為壘噉虜為餉決命再宿衝潰
重圍連兵躡踵千里轉戰全薛公於河外反知運於寇
手朔方諸軍壯其戰矣研磨之奔也邀于黑山口覆其
精銳布思之背也追至紅桃帳掩其輜重乳洎之會刺
蘭池之狂胡木盤之役縲右渠之逋寇凡前後大戰數
十小戰數百筭無遺策兵有全聲是以六狄逃遁三垂
入寧聲暴露於天下業光華於世載信皇威之所加亦
武臣之力也故錦衣寶玉允答戎功甲第良田丕承王

命語其智効未甚優寵黃頭黑齒比價齊名積戰多瘡
累勞生疹恩命尚藥馳往診之晉堅已深秦醫無及十
一年四月十五日薨于位享年六十有六制贈為撥川
王稱故國本其志也太常議謚曰忠由舊典昭其行也
長子雲忠襲官封繼事業次子舊久特拜郎將十二年
四月詔塋於京城之南懷遠人也太常鼓吹介士龍旂
虎帳貂裘封犇殉馬吉凶之義舉夷夏之物備長安令
總徒以護事鴻臚卿序賓以觀禮哀榮之道著矣君臣

之義厚矣有命國史立碑表墓吾嘗同寮敢陳遺烈銘
曰

黃河接天青海殊壤舉世安裕拔俗誰敢倬哉論侯利
有攸往奮飛橫絕搏空直上以衆歎塞因敵立勲吐渾
萬戶吟嘯成羣精感天地氣合風雲既封酒泉乃位將
軍朔方陰塞直彼獯虜帝命先鋒闕為虓虎山北加電
漢南擊鼓數年之間耀國威武我有師旅將軍鞠之我
有邊氓將軍育之柳澗七師一劒復之蘭池叛胡三戰

覆之武節方壯朝露不待王爵送終宿恩未改時來世
往人亡物在銘勲謚忠以告四海

自古中國威德行于四夷惟唐為盛漢與三代皆不
及究其所以雖非一術而推誠番將實其大端如史
所載阿史那社爾契苾何力黑齒常之論弓仁及弓
仁之孫惟貞其人才皆中國所罕即如此文所稱卧
沙塞猶衽席夜霜入于鬚髮中國之人還堪此否此
實有志攘夷者所當知至于林甫將番一段公案因

駕御失宜不可因噎廢食也

六祖能禪師碑銘

王維

無有可捨是達有源無空可住是知空本離寂非動乘
化用常在百法而無得周萬物而不殆鼓棹海師不知
菩提之行散花天女能變聲聞之身則知法本不生因
心起見見無可取法則常如世之至人有證於此得無
漏不盡漏度有為非無為者其惟我曹溪禪師乎禪師
俗姓盧氏某郡某縣人也名是虛假不生族姓之家法

無中邊不居華夏之地善習表於兒戲利根發於童心
不私其身臭味於耕桑之侶苟適其道羶行於蠻貊之
鄉年若干事黃梅忍大師願竭其力即安於井臼素剗
其心獲悟於梯稗每大師登座學衆盈庭中有三乘之
根共聽一音之法禪師默然受教曾不起予退省其私
迥超無我其有猶懷渴鹿之想尚求飛鳥之跡香飯未
消弊衣仍覆皆曰升堂入室測海窺天謂得黃帝之珠
堪授法王之印大師心知獨得謙而不鳴天何言哉聖

與仁豈敢子曰賜也吾與汝不如臨終遂密授以祖師
袈裟謂之曰物忌獨賢人惡出已予且死矣汝其行乎
禪師遂懷寶迷邦銷聲異域衆生為淨土雜居止於編
人世事是度門混農商於勞侶如此積十六載南海有
印宗法師講涅槃經禪師聽於座下因問大義質以真
乘既不能酬翻從請益乃歎曰化身菩薩在此色身肉
眼凡夫願開惠眼遂領徒屬盡詣禪居奉為挂衣親自
削髮於是大興法雨普灑客塵乃教人以忍曰忍者無

生方得無我始於成初發心以為教首至於定無所入
惠無所依大身過於十方本覺超於三世根塵不滅非
色滅空行願無成即凡成聖舉足下足長在道場是心
是情同歸性海商人告倦自息化城窮子無疑直開寶
藏其有不植德本難入頓門妄繫空花之狂曾非惠日
之咎常歎曰七寶布施等恒河沙億劫脩行盡大地墨
不如無為之運無礙之慈弘濟四生大庇三有既而道
德遍覆名聲普聞泉館卉服之人去聖歷劫塗身穿耳

之國航海窮年皆願拭目於龍象之姿忘身於鯨鯢之口駢立於戶外趺坐於床前林是旃檀更無雜樹花惟薝蔔不嗅餘香皆以寶歸多離妄執九重延想萬里馳誠思布髮以奉迎願入手而作禮則天太后孝和皇帝並勅書勸諭徵赴京城禪師子牟之心敢忘鳳闕遠公之足不過虎溪固以此辭竟不奉詔遂送百衲袈裟及錢帛等供養天王厚禮獻玉衣於幻人女后宿因施金錢於化佛尚德貴物異代同符至某載月日忽謂門人

曰吾將行矣俄而異香滿室白虹屬地飯食訖而敷坐
沐浴畢而更衣彈指不留水流燈焰全身永謝薪盡火
滅山崩川竭鳥哭猿啼諸人唱言人無眼目列郡慟哭
世且空虛某月日遷神於曹溪安坐於某所擇吉祥之
地不待青鳥變功德之林皆成白鶴嗚呼大師至性淳
一天姿貞素百福成相衆妙會心經行晏息皆在正受
談笑語言曾無戲論故能五天重跡百越稽首脩蛇雄
虺毒螫之氣銷跳父鸞弓猜悍之風變畋漁悉罷蠱醜

知非多絕羶腥効桑門之食悉弃罽網襲稻田之衣永
惟浮圖之法實助皇王之化弟子曰神會遇師於晚景
聞道於中年廣量出於凡心利智踰於宿學雖末後供
樂最上乘先師所明有類獻珠之顧世人未識猶多抱
玉之悲謂余知道以頌見託偈曰

五蘊本空六塵非有終生倒計不知正受蓮花承足楊
枝生肘曷離身心孰為休咎至人達觀與佛齊功無心
捨有何處依空不著三界徒勞八風以茲利智遂與宗

通愍彼偏方不聞正法俯同惡類將興善業教忍斷嗔
脩慈捨獵世界一花祖宗六葉大開寶藏明示衣珠本
源常在妄轍遂殊過動不動離俱不俱吾道如是道豈
在吾道遍四生常依六趣有漏聖智無義章句六十二
種一百八喻悉無所得應如是住

舊唐書本傳云維兄弟俱奉佛居常蔬食不衣文綵
得宋之間藍田別墅在輞口輞水周于舍下別漲竹
洲花塢與道友裴迪浮舟往來彈琴賦詩嘯咏終日

在京師日飯十數名僧以玄談為樂齋中無所有惟
茶鐺藥臼經案繩床而已退朝之後焚香獨坐以禪
誦為事妻亡不再娶三十年孤居一室屏絕塵累臨
終與親故書多敦厲奉佛脩心之旨捨筆而絕按公
著作如與魏居士書胡居士諸詩及此碑皆見地超
絕宜其去來自在乃爾非鸚鵡禪所可髣髴也此碑
實不減子厚作以四六叙事至執役槽廠混跡獵
夫一一皆寫出豈非化工手

唐故特進贈開府儀同三司揚州大都督南府君

睢陽廟碑 柳宗元

急病讓夷義之先

臧文仲曰賢者急病讓夷夷平也

圖國忘死貞之大

利合而動乃市賈之相求恩加而感則報施之常道睢陽所以不階王命橫絕凶威超千祀而挺生奮百代而特立者也時惟南公天與拳勇神資機智藝窮百中豪出千人不遇興詞鬱危眉之都尉數奇見惜挫援臂之將軍天寶末寇劇憑陵隳突河華天旋虧斗極之位地

圯積狐狸之穴親賢在庭子駿陳蕃以佐命元老用武
夷甫委師而勸進惟公與南陽張公巡高陽許公遠義
氣懸合許謀大同誓檣武旅以遏橫潰裂裳而千里來
應左袒而一呼皆至柱厲不知而死難狼睥見黜而奔
師忠謀朗然萬夫齊力公以推讓且專奮擊為馬軍兵
馬使出戰則羣校同強入守而百雉齊固初據雍丘謂
非要害將保江淮之臣庶通南北之奏復拔我義類扼
于睢陽前後捕斬要遮凶氣連沮漢兵已絕守疏勒而

彌堅虜騎雖強頓盱眙而不進賊徒乃棄疾于我悉衆
合圍技雖窮于九攻志益專于三板徧陽懸布之勁汧
城鑿穴之奇息意牽牛羞鄭師之大臨甘心易子鄙宋
臣之病告諸侯環顧而莫救國命阻絕而無歸以有盡
之疲人敵無已之強寇公乃躍馬潰圍馳出萬衆抵賀
蘭進明乞師進明乃張樂侑食以好聘待之公曰敝邑
父子相食而君辱以燕禮獨何心歟乃自噬其指曰噉
此足矣遂慟哭而返即死孤城首碎秦庭終憫無衣之

賦身離楚野徒傷帶劍之辭至德三年十月城陷遇害
無傳變之歎息有周苛之慷慨聞義能徙果其初心烈
士抗詞痛臧洪之同日直臣致憤惜蔡恭于累旬朝廷
加贈特進揚州大都督定功為第一等與張氏許氏並
立廟睢陽歲時致祭男在襁褓皆受顯秩賜之土田塋
刻鮑信之形陵圖龐德之狀納官其子見勾踐之心羽
林宇孤知孝武之志舉門闕于周典徵印綬于漢儀王
猷以光寵錫斯備於戲睢陽之事不唯以能死為勇善

守為功所以出奇以恥敵立謹以怒寇

謹音謹勇也俾立謹出列子

其專力于東南而去備于西北力專則堅城必陷備去則天討可行是故即城陷之辰為尅敵之日世徒知力保于江淮而不知功靖乎醜虜論者或未之思與公諱霽雲字某范陽人有子曰承嗣七歲為婺州別駕賜緋魚袋歷施涪二州服忠思孝無替負荷懼祠字久遠德音不形願斷堅石假辭紀美惟公信以許其友剛以固其志仁以殘其肌勇以振其氣忠以摧其敵烈以死其

事出乎內者合于貞行乎外者貫于義是其所以奮百
代而超千祀者矣其志不亦宜乎廟貌斯存碑表攸託
洛陽城下思鄉之夢儻來麒麟閣中即圖之詞可繼銘
曰

貞以圖國義惟急病臨難忘身見危致命漢寵死事周
崇死政烈烈南公忠出其性控扼地利奮揚兵柄東護
吳楚西臨周鄭婪婪羣凶害氣彌盛長蛇封豕踊躍不
定屹彼睢陽制其要領橫潰不流疾風斯勁梯衝外舞

缶穴中偵鈴馬非艱析骸猶競浩浩烈士不聞濟師兵
食殲焉守逾三時公奮其勇單車載馳投軀無告噬指
而歸力窮就執猶抗其辭圭璧可碎堅貞不虧寇力東
盡兇威西慙

惡女
六切

孤城既拔渠魁受戮雷霆之誅由我

而速巢穴之固由我而覆江漢淮湖羣生咸育倬焉勲
烈孰與齊躅天子震悼陟是元功旌褒有加命秩斯崇
位尊九牧禮視三公建茲祠宇式是形容牲牢伊碩黍
稷伊豐虔虔孝嗣望慕無窮刊碑河澨萬古英風

柱厲叔事莒敖公自以為不知己去居海上及公有
難乃往死之曰以醜後世之人主不知其臣者晉襄
公縛秦囚使萊駒以戈斬之囚呼萊駒失戈狼睥取
戈斬囚遂以為右箕之役先軫黜之狼睥怒及彭衙
既陳以其屬馳秦師死焉此二事用于霽雲碑是子
厚微意徐師川詩開元天寶中袞袞見諸公不聞張
與許名在臺省中亦子厚指也

三受降城碑銘

呂溫

夏后氏遏洪水馭龍蛇能禦大菑以活黔首周文王城
朔方逐獫狁能捍大患以安中區若非高岸峻防重門
擊柝雖有盛德曷觀成功然則持璿璣而弛張萬象昊
穹之妙用扼勝勢以擒縱八極王者之宏圖道雖無外
權則有備變化消息存乎其人三受降城皇唐之勝勢
者也昔秦不量力北築長城右扼臨洮左馳碣石生人
盡去不足乘障兩漢之後頗為荒丘退居河滸歷代莫
進矯亡秦之弊則可矣盡中國之利則未然唐興因循

未暇經啟有拂雲祠者在河之北地形雄坦控扼樞會
虜伏其下以窺域中禱神觀兵然後入寇甲不及環突
如其來鯨一躍而吞舟虎數步而擇肉塞草落而邊毗
懼河冰堅而羽檄走爰自受命至于中興國無寧歲景
龍二年默啜強暴瀆鄰構怨掃境西伐漢南空虛朔方
大總管韓國公張仁愿躡機而謀請築三城奪據其地
跨大河以北嚮制胡馬之南牧中宗詔許橫議不撓於
是留及瓜之戍斬姦命之卒六旬雷動三城岳立以拂

雲祠為中城東西相去各四百里過朝那而北關斥候
迭望幾二千所損費億計減兵萬人分形以據同力而
守東極于海西窮于天納陰山於寸眸拳大漢於一掌
驚塵飛而烽火燿孤鴈起而刁斗鳴涉河而南門用晏
閑韓公猶以為未也方將建大旆提金鼓馳神竿鞠虎
旅看旄頭明滅與太白進退小則貢琛責受厥角定保
塞一隅之安大則倒狼居竭瀚海空苦塞萬里之野大
略方運元勲不集天其未使我唐無北顧之憂乎厥後

賢愚迭任工拙異勢剛者黷武柔者敗律城隳險固寇
得凌軼或駟馬飲河而去或控弦劇壘而旋吾知韓公
不瞑目於地下矣今天子誕敷文德茂育羣生戢兵和
親北狄右衽然而軍志有受降如敵大易有安不忘危
崇墉言言其可弛柝亦宜鎮以元老授之廟勝俾述舊
職而恢遺功外勤撫綏內謹經略使其來不敢仰視去
不敢反顧永讐猛氣無生禍心聳威馴恩禽息荒外安
固萬代術何加焉敢勒銘城隅庶復隍而光烈不昧銘

曰

韓侯受命志在朔易北方之強制以全策亘漢橫塞揭
茲雄壁如三鬪龍躍出大澤並分襟帶各閉風雷俯視
陰山仰看昭回一夫登陴萬里洞開日晏秋盡纖塵不
來時惟韓侯方運神妙觀釁則動乃誅乃弔廓乎窮荒
盡日所照天乎未贊不策清廟我聖耀德罷局北門優
而柔之用息元元曷若兒守推亡固存于襄于夷永裕
後昆

三受降城皆在黃河北岸今河套之北也中城南直朔方安北都護府在焉東城在勝州之北西城在豐城之北此唐史註也宋初曰中城南直朔方西城南直靈武東城南直榆關宋白曰東城本漢雲中郡地中城本漢五原郡地西城本漢臨河縣地三說微有不同如宋白所考則東受降當與大同相近去黃河遠矣或者漢雲中郡地廣西接榆關非止大同府境也大抵漢築朔方守在河南唐築三城守在河北今

河南已為虜巢矣況河北乎右穀山筆麈

故太子少保贈尚書左僕射京兆韋府君神道碑

呂溫

山之大者匿峰巒含氣象積高無倪而不見其險孕粹
有物而不知其神此其所以為大也德之全者毀圭方
黜皎厲靈機密運而智不驚愚遐標特立而迹無變俗
此其所以為全也然則太山高而可陟全德近而難知
我求其倫見之於少師公矣公諱某字某京兆杜陵人

其先帝堯光宅讓德儲慶建國命氏列于夏商相胄卿
族繁于漢魏代濟不殞煥焉盛門大王父諱某皇朝主
客郎中萊濟商三州刺史王父諱某倉部郎中太原少
尹贈秘書監烈考諱某檢校都官郎中嶺南節度行軍
司馬贈同州刺史或以瑚璉之器纔施郡政或以巖廊
之姿僅及戎佐與時俱息從道而污屈不試於當年啟
莫京於身後公生而岐嶷弱而老成渾粹不散清明虛
映朱絃遺音而宮商自韻大圭不琢而符彩溢發邈矣

天爵爛乎人文鼓鍾之聲日遠卿典之譽來逼釋褐太
子正字與仲弟正卿以賢良偕徵策入異等冥鴻雙舉
當代榮之授高陵主簿遷監察御史改殿中內供奉東
都留守判官即拜東臺殿中侍御史參畫惟允持繩不
回河洛之間風聲尚在德宗躬決庶政本於尚書責成
曹郎綜練材實薦出方伯時超貳卿二十年間斯為極
選公由是前後遷刑部吏部員外郎吏部郎中奏議推
美彌綸成績南宮之故事存焉于時戡復日近勲勤者

衆都市情游盡垂金組邦畿豪奪半賜丹書輕禽逸於
疎網悍馬駭於柔轡上思懲抑必假良能公由是前後
歷奉天長安二縣令仁護鰥惻智矜豪右與人之遺詠
在焉望由實濟任以望重選曹未幾遷給事中既居駁
正之司不撓當官之論屬東南歲歉俾入惟難出為常
州刺史天寶之後中原釋耒輦越而衣漕吳而食一隅
重困五紀于茲公臨之清貞結以忠恕固存惠寡務嗇
勤分一法以去其侵漁多方以備其災患以逸道而使

繕完允濟以與道而取賦入先期聲聞天朝考績連最
轉蘇州刺史二境之間百里而近靈源自出殊派其清
膏澤所霑異壤同潤下車朞月報政如初加秩賜金借
留累歲無何彭沛喪師兵驕地偏安危所繫朝論難之
乃以公檢校秘書監兼御史中丞賜紫金魚袋充徐泗
節度行軍司馬重其威望將委旄鉞而未命程伯徐方
之軌既同不見賈生宣室之徵遽至擢吏部侍郎倫品
甄明通簡節適勢有探湯之熱我以靜濯衆有鼓簧之

宣我以心聽馴致其美闇然日彰不求無失職之人人
自以為不失職矣輟拜京兆尹德刑交脩寬猛相濟匪
設鉤距物無遁情匪曜鋒鉞機無滯斷浩穰之理不肅
而成不求無不欺之吏吏自以為不能欺矣俄改太子
賓客辭劇就閑圖南之勢一息遜德求舊居東之命惟
重遷檢校工部尚書兼御史大夫充東都留守東都畿
汝州都防禦使自盜起幽陵兵屯諸夏涉淮而北軍國
異容分陝以東古今殊寄公講信脩睦外張保釐之政

完備訓戒內寓折衝之令矛戟不露德耀藹然遐邇頌
首以承風強暴革心而知懼今上嗣統就加檢校吏部
尚書方入諧僉屬毘贊大化不幸嬰疾表求退頤優詔
除太子少保冀其休復將有後命神祇竟昧藥禱無真
以元和元年三月十二日薨於東都履信里之私第享
年六十有四寵贈尚書左僕射轡車西歸制使賻弔太
常褒議謚曰某公哀榮備矣夫人河東裴氏侍中耀卿
之孫給事中皋之女德門鍾美淑問充塞薜華早落著

兆叶期即以是年五月二十一日合塋于萬年縣高平鄉少陵原禮也公孝悌天至行有餘力仁義性德匪俟服膺不飾表以近明每縱心而中矩清虛簡淡而應物不倦通曠夷易而及門無雜不尚意氣而然諾篤志不好臧否而鑒識超倫與故相國齊江西映穆宣州贊贊弟侍御史員為文章道義之友可以視其所親矣今吏部郎中扶風竇羣抗迹毗陵退身進道公三揖郡榻之上振天墀之下不數歲間蔚為重器可以視其所舉

矣分正東郊開府辟土則有今右司郎中燉煌段平仲
倉部員外郎安定皇甫鑄禮部員外郎清河張賈京兆
尹韋嗣隴西李景儉中山衛中行平陽路隨皆羣彥之
秀出一時之高選可以觀其所任矣加以志尚幽遠冥
搜好古所居第必有松石之致退公暇日常以圖籍自
娛一字愜心金玉不顧片言同趣布褐無間疊疊然若
見道之所存陶陶然不知歲之云晏於戲策名從事四
十餘年朋友罕聞得喪之言家人莫見喜愠之色坦懷

以處推分而行無怨於人人亦無怨無猜於物物亦無猜履信順以優游保福祿而終始其名教之大雅者歟有九子長曰元質前常州義興縣尉次曰穀前邠州司倉次曰璋鄉貢進士能脩詞立誠克家致美茂揚風訓休有令問其次某某等皆殊資異識登於童齒慶善之餘也以某獲窺牆仞見託篆述究賢人之業信而無媿申孝子之志直而不文其詞曰

利建于商介圭作寶爰立于漢緇衣改造克昌厥亂奕

世載考亞尹擅名郎中懷道莫躋貴仕莫享難老蘊靈
儲休以啟少保不顯少保其德惜惜有綽遐姿曠哉靈
襟顯仁山立藏用淵沉煦如冬陽藹若春陰白圭三復
克保明心黃鍾九變莫匪和音靜專動直謙進柔克宜
踐公輔以楨王國促路頻軌中天墜翼少陵右原拱樹
寒色窮壤可弊唯名不失金石垂之以慰罔極

碑文不著韋名考竇羣傳云蘇州刺史韋夏卿薦之
不召後夏卿入為京兆尹復言之德宗入為左拾遺

金石錄卷十一
合之此碑其為夏卿無疑但竇羣皇甫鏞非佳士化
光為羣所厚故稱之非公論也靈機密運二語世豈
有斯人其惟聖人乎

幽州紀聖功碑銘

李德裕

幽州盧龍軍帥檢校左僕射張公仲武往年脩獻捷之
禮今歲有銘勳之請二者君子矐之豈不以諸侯有四
夷之功獻其戎捷春秋舊典也宗周納肅慎之貢銘於
栝矢天子令德也斯可以為元侯表可以為後代法聖

上嘉其勳而中禮乃命宰臣採其元功傳於惇史臣德裕敢颺言曰夫兵者所以除暴害也愛人則惡其為害禁暴則惡其為亂雖叡智不殺化之以神至德允懷招之以禮然書有猾夏之戒傳有脩刑之訓虞舜四罪乃成大功文王一怒以至無侮非德教之助歟仁聖文武章天成功神德明道大孝皇帝熙我文典煥乎光明極象外之微臻於至道鼓天下之動致於中和慮必鉤深退而藏密故能神幾獨照成未兆之謀威光遠震制不

羈之虜當其時也烽燧迭警羽書狎至人心大搖羣師
沮氣皇帝以軒后之威神漢高之大略光武之雄斷魏
祖之機權合而用之以定王業此議臣所以不敢望於
清光也倬哉天地應而品物生君臣應而功業成故龍
躍而雲從鶴鳴而子和方叔伐獫狁蠻荆來威安遠擊
車師西域震服宜有良將殿于朔邊張公禮悅戰器書
成傳癖張仲孝友子孺塞泉流落不耦光景未耀明主
雅聞奇志持印而拜將軍遙推赤心築壇而命元帥拔

自雄武授之薊門果能精誠奮發策慮偏臆千里獻籌
一心憂國則知龍顏善將任人傑而不疑日角好謀歎
敵國而強意迴鶻者本北狄之裔也或曰獯豸或曰山
戎五帝所不能臣三王所不能制前史載之悉矣暨薛
延陀之敗也酋帥吐迷度率衆款塞太宗幸靈武納降
立迴鶻部落置瀚海都督因我封殖遂雄北方肅宗之
戡內難也葉護以射鶻之士親扈戎旌亦由羌髡率師
以翼周北貊集騎以助漢既滅大憝乃疇厥功特拜葉

護司空歲贈繒二萬匹厥後飾宗女以配之立宮室以居之其在京師也淫祠雲構甲第棊布棟宇輪奐衣冠縞素交利者風偃挾邪者景附其翎侯貴種則被我文纁帶我金犀悅和音厭珍膳竭蠹上國百有餘年既而桀驚無親天命不祐僭侈極欲神道惡盈本國荐饑畜產耗半黠憂斯因利乘便遂焚龍庭墟落蕭條陰燐青熒今之烏介可汗亡迷失國竊號沙漠非我策命自為假王其來也羨漫陰山睥睨高闕玄塞之下氛霧蔽天

質貴主以前驅依大國而求援或丐我米糈救其饑人
或邀我甲兵復其故地外雖柔服內有桀心因行人致
辭徵呼韓故事願居光祿塞急保受降城其下有二部
曰赤心宰相那頡吸特勒赤心者天性忿驚戎馬尤盛
初與名王噶沒斯首謀內附俄而負力怙氣潛圖厲階
為噶沒斯所紿誘以俱謁可汗戮於帳下其衆大潰東
逼漁陽上乃賜公璽書授以方略公以室韋悍亟之兵
近我邊鄙俾其傾邏且禦內侵尋以徵役不供為虜所

敗由是介馬數萬連亘幽陵伏精甲於松栢布穹廬於
磧鹵散若飛鳥止如長雲火燎于原不可嚮邇公激義
氣以虹貫發精誠而右開奇計兵權密授髦儁乃命介
弟仲至與裨將游奉寰王如清左敵萬李君慶張自榮
高守素李志操率銳兵三萬建旆而前介胄雪照戈矛
林植命以義殉壯由師直聲隆隆而未洩欲逐逐而不
食戢以聽命嚴而有威公曰險道傾仄且馳且射胡兵
所以無敵也致之平原勒以方陣我師可以逞志也於

是據于莽平環以武剛首尾蛇伸左右翼張輕騎既合
奇鋒橫驚如摧枯株如搏畜兔攝讐者弗取陸梁者皆
仆虜戾王貴人計以千數然後盡羅服聽悉數系累谷
靜山空靡有孑遺索馳駛風澤而散旃檀羅幕布野
畢收馬牛幾至於谷量虜血殆同於川決徑路寶刀祭
天金人奇貨珍器不可殫論乃命從事李周瞳馳傳上
奏又命牙門將國從玘繼獻戎俘皇帝受而勞之羣臣
畢賀昔長平七徑驃騎六舉實憲合氏羌之衆陳湯檻

城郭之兵或生靈減耗士馬痛傷邀功救罪矯命專征
然猶告類上帝薦功清廟顧視二漢不其恧歟以公威
動蠻貊功在漏刻因命公為東面招撫迴鶻使先是奚
契丹皆有虜使監護其國責以歲遺且為漢謀自迴鶻
嘯聚靡不鴟張公命裨將石公緒等諭意兩部戮迴鶻
八百人雖介子討罪於龜茲班超行誅於鄯善未足倚
也迴鶻又遣宣門將軍等四十七人詭辭結歡潛伺邊
隙公密賂其下盡得陰謀且欲馳入五原大毆雜虜公

逗留其使緩彼師期竟得人病馬瘡縮血而退挫銳解
紛緊公善計今烏介自絕皇澤莫敢近邊并丁令以圖
安依康居而求活盡死餘種屈意黑車寄託遠遁流離
饑凍黑車亦倚其威重迫脇諸戎造謀籍兵解仇交質
自謂約賈深入漢將取而未期渡幕輕留王師往而非
利公以壯猷遠御長計羈縻不媿避嫌之便終盡致敵
之術將時動而得雋豈歲數而勝微矧乎明主仗將帥
為爪牙視戎狄為鼠羸方獵猛敵不翫細娛非周宣無

以成召虎之勲非漢宣無以聽營平之計勗哉上將光
我中興公前後受降三萬人特勒二人可汗沛一人都
督外宰相四人其他裨王騎將不可備載王褒以日遂
歸德稱為人瑞班固以稽落蕩寇大振天聲孰若天子
神武百蠻震懼乘其蹙困臨以兵鋒刈單于之旗納休
屠之附非萬里之伐無三年之勤魏乎成功輝焯後代
宜刻金石以揚鴻休銘曰

大和之初赤氣宵興開成之末彤雲暮凝異鳥南來胡

滅之徵北夷颺掃厥國土崩逼迫遷徙震我邊鄙長蛇
云穴奔鯨失水上郡薊門兵連千里曾不畏天猶為驕
子丐我邊穀邀我王師假我一城建彼幡旗歸計強漢
邳支嫚辭狼顧朔野伏莽見羸鴈門之北羌戎雜處澱
滅羣羊茫茫大鹵縱其梟騎驚我牧圉暴若豺狼疾如
風雨皇赫斯怒羽檄徵兵謀而泉默斷乃雷聲沈機變
化動若神明沙漠之北虜無隱情漁陽突騎燕歌壯氣
赳赳元戎眈眈虎視金鼓誓衆千旄蔽地爰命介弟屬

之大事翩翩飛將董我三軍稟兄之制代帥之勤威畧
火烈胡馬星分戈迴白日劒薄浮雲天街之北旄頭已
落絕轡之野蚩尤未縛俾我元侯恢弘遠略取彼單于
係之徽索陰山寢烽亭徽橐弓萬里昆夷九譯而通蠻
夷既同天子之功儒臣篆美刊石垂鴻

平淮西碑于諸將相皆稱官稱名蓋歸功主上自合
如此此文以紀聖為題而篇中稱仲武為公非體也
豈至此而藩鎮之勢愈重耶 困學紀聞云唐五代

之際以文紀事者多用故事而作史者因而舛謬回
鶻烏介可汗走保黑車子族李德裕碑文云烏介并
丁令以圖安依康居而求活所謂康居用漢書郅支
事也而舊史云烏介依康居求活北漢鄭珙卒于契
丹王保衡晉陽見聞錄虜俗雖不飲酒如韋曜者亦
加灌注韋曜即吳孫皓時韋昭也而路振九國志云
高祖鎮河東命韋曜北使曜不能飲酒虜人強之此
殆類癡人說夢也按此一段讀四六文者不可不知

附錄于此

周故大將軍幽國公墓銘

庾信

公諱廣字乾歸邵惠公之元孫幽孝公之長子若木拂
日長蛇委天龍圖幕河之光神鼎連雲之氣六辯構宇
五運徵祥是以維嶽降神自天生德凝脂點漆日角珠
庭為子則名高五都為臣則光照千里華蓋中天之峰
未階其峻虞淵浴日之水不盡其源歲在瑯車年方竹
馬月中桂樹切問能訓石上木生懸思即悟年十一孝

公薨號號在疚孺慕過禮泉驚孝水竹動寒林三行克
宣八翼斯舉大周建國宗子維城設壇封人分司典命
開國天水郡公食邑二千戶元年授使持節驃騎大將
軍開府儀同三司其年四月授都督秦州刺史孝公久
牧汧隴遺愛在人今茲見撫我君之子豈獨司隸之臺
鮑宣累葉丞相之府韋賢重代二年拜大將軍方衛青
之張幕冊重元勲譬韓信之登壇榮高獨拜武成元年
遷都督興梁等十九州諸軍事梁州刺史岷冢導漾乃

濟漢之東流蔡蒙旅平實華陽之西極其年九月改封
蔡國公食邑萬戶地接韓城關隣楚鄆戶封八縣恩深
寇恂之功邑啟萬家事極曹參之賞保定元年授小司
寇犴戶苔生圉關籥動載酒屬車幸無冤氣觀囚軍府
或聽鳴琴二年轉守蒲城都督潼關等六防諸軍事其
年閏月遷都督秦渭等十二州諸軍事秦州刺史公亟
牧冀城頻藩隴坻豪傑斂手貪殘解印加以上谷精兵
漁陽噪鼓北臨高柳南望長榆匈奴下馬之山貴相藏

酒之谷莫不遠慕威聲遙承風化二年奉詔向甘州迎
皇后有文書手仲子之歸紀裂繻來卿為君逆自非名
高絕國威被和鄰豈得稱族而行尊君之命四年授柱
國大將軍昭陽以功高見用項梁以名將當官以今方
之彼有慙德天和三年授都督陝虞等八州甘防諸軍
事陝州刺史屈產垂棘既有滅虢之兵王官羈馬非無
絕秦之路公以正正鼓旗閑閑車軌服叛威邊笑無遺
策但以中外久勞積斯災疾山川則並走羣望賓客則

諸侯在門是以請謁承明言歸湯沐方詢夏郊之祀或
辯桑林之崇更除秦州刺史仍襲父爵幽國公分流之
嶺未登晚塞之城空望太夫人以公羸瘠悲泣相守胸
氣交衝奄捐館舍公頓伏苦寢水漿不入雖王人勸奪
瘡鉅愈增母死於子子死於親慈孝之道一朝總集大
漸之辰春秋二十有九四闕罷市三軍行哭言尋聽訟
猶見寒棠還顧空營唯餘衰柳謚贈某官禮也六年六
月歸塋於秦州之某原玄甲啟路追軫驃騎之功龍旂

贈行深悼東平之遠公亮直惟忠溫恭惟孝居之仁義
飾以禮樂風神機警聰睿精明有伋於宮牆無形於喜
愠金版玉策之記枕籍忘疲蘭葉芝花之圖膏映必舉
碣石秋雲昭陽落月思風含臆言泉流吻翩翩書記則
阮瑀陳琳荏荏風流則王濛謝尚語其百發弓絕於猿
吟論其百中劒深於鴈陣枚乘之望梁苑不憚棄官樂
毅之求燕路無辭千里至如應變將略雷電立成帷帳
謀猷孫吳闇合有品藻人理之志有清平天下之心鵬

路忽摧龍津遂壅嗚呼哀哉大宰早茂三荆長辭萬始
撫養遺孤連枝同氣馬援之誠兄子義存謹飭王況之
事世叔情深愛敬同德比義此之謂乎乃為銘曰

御乾從紀乘離作聖白環讓德玄珪受命平一地紐增
輝天鏡傍廕數國前臨七政地屬先登時逢下武玉璜
撥亂金滕光輔衛晉承家邢茅胙土波分建木派流玄
滬景命寅敘徽猷淵塞忠有令圖考為全德山節蒞政
桓珪守國瀚海將臨燕山行勒平樂高晏金華說經論

儒璧水親禮明庭相風待賦承露須銘乘舟向日策馬
隨星德舉克明能賢允淑上將授脤元戎推轂趙失東
漁胡亡南牧箭下遼城泥封函谷袞衣頻露丹旌亟卷
約法情推繁辭理遣盜烏懸察疑蛇立辯人共官園家
同野繭繭雲推景轉風落似星裂中台山傾左鎮夏楹
舍爵殷階啟殯繆幕躡行明旌庭引秦川直望隴水分
飛山河滿目容衛靈歸陵圖石馬車畫袞衣小山搖落
長林變衰悽愴原隰荒涼宅兆樹密人稀山多路少十

里松城千年華表夜臺方寂窮泉無曉

周書幽國公廣大祖長兄顥之孫

周大將軍懷德公吳明徹墓誌

庾信

公諱明徹字通昭兗州秦郡人也西都列國長沙王功
被山河東京貴臣大司空名高霄漢豈直西河有守智
足抗秦建平有城威能動晉而已也祖尚南譙太守父
樹右軍將軍抗拒淮沂平夷濟漂代為名將見於斯矣
公志氣縱橫風情倜儻圮橋取履早見兵書竹林逢猿

偏知劍術故得勇爵登朝材官入選起家東宮直後除
左軍葛瞻始嗣兵戈仍遭蜀滅陸機纔論功業即值吳
亡公之在梁未為達也自梁受終齊卿得政禮樂征伐
咸歸舜後是以威加四海德教諸侯蕭索烟雲光華日
月公以明略佐時雄圖贊務鱗翼更張風飈遂遠冠軍
侯之用兵未必師古武安君之養士能得人心擬於其
倫公之謂矣為左衛將軍尋遷鎮軍丹陽尹北軍中候
總政六師河南京尹冠冕百郡文武是寄公無愧焉蕭

湘之役憑陵島嶼風船火艦周瑜有赤壁之兵蓋舳櫓
艦魏齊有橫江之戰仍為平南將軍開府儀同三司都
督湘衡桂武四州刺史遂得左廣迴局麟車反暢長沙
楚鐵更入兵欄洞浦藏犀還輸甲庫雖復戎歌屢凱軍
幕猶張淮南望廷尉之囚合肥稱將軍之寇莫不失穴
驚巢沉水陷火為使持節侍中司空車騎大將軍都督
南北兗青譙五州諸軍事南兗州刺史南平郡開國公
食邑八千戶鼓吹一部中台在玄武之宮上將列文昌

之宿高蟬臨鬢吟驚陪軒平陽之邑萬家臨菑之馬千
駟坐則玉案推食行則中分麾下生平若此功業是焉
既而金精氣壯師出有名石鼓聲高兵交可遠故得艫
舳所臨蓋於淮泗旌旗所襲奄有龜蒙魏將已奔猶書
馬陵之樹齊師其遁空望平陰之烏俄而南仲出車方
叔蒞止暢轍文茵鈎膺偉華遂以天道在北南風不競
昔者裨將失律衛將軍於是待罪中軍爭濟荀桓子於
馬受戮心之憂矣胡以事君宣政元年屆於東都之亭

有詔釋其鸞鑣蠲其釁社始弘就館之禮即受登壇之策拜持節大將軍懷德郡開國公邑二千戶歸平津之館時聞櫪馬之嘶舍廣城之傳裁見諸侯之客庶頗眷戀寧聞更用之期李廣盤桓無復前驅之望霸陵醉尉侵辱可知東陵故侯生平已矣大象二年七月二十八日氣疾增暴奄然賓館春秋七十七即以其年八月十九日寄瘞於京兆萬年縣之東郊詔贈某官謚某禮也江東八千子弟從項籍而不歸海島五百軍人為田橫

而俱死焉嗚呼哀哉毛脩之埋於塞表流落不存陸平
原敗於河橋死生慙恨反公孫之柩方且未期歸連尹
之尸竟知何日遊魂羈旅足傷溫序之心玄夜思歸終
有蘇韶之夢遂使廣平之里永滯冤魂汝南之亭長聞
夜哭嗚呼哀哉乃為銘曰

九河宅上三江貢職彼美中邦君之封殖負才矜智乘
危恃力浮磬戢鱗孤桐垂翼五兵早竭一鼓前衰移營
減竈空幕禽飛羊皮詎贖畫馬何追荀瑩永去隨會無

歸存沒俄頃光陰愴悽岳裂中台星空上將眷言妻子
悠然亭障魂或可招喪何可望壯志沉淪雄圖埋沒西
隴足抵黃塵碎骨何處池臺誰家風月墳塋羈遠營魂
流寓霸岍無封平陵不樹壯士之隴將軍之墓何代何
年還成武庫

陳書大建九年司空吳明徹破周將梁士彥衆數萬
于呂梁十年北討衆軍敗績于呂梁明徹及將卒已
下並為周軍所獲又南史明徹窮蹙就執周封懷德

郡公位大將軍以夏構疾卒于長安後故吏盜其柩歸

周趙國公夫人紇豆陵氏墓誌銘

庾信

夫人諱舍生本姓竇扶風平陵人魏其朝議列侯則莫能抗禮安豐奉圖功臣則咸推上席外戚列傳既聞建武之書仲山古鼎或表單于之獻祖略少保建昌郡公父熾柱國大將軍太宗伯鄧國公孟津大誓常預同德之臣咸陽違約克贊先登之主並得位入六府功參八

柄夫人有文在手有象應圖榮曜夙彰徽華早茂肅恭
以禮受教於公宮言容以德有聞於師氏及乎進賢君
子內主邯鄲琴瑟在堂輜輶是服長久於節不無秋菊
之銘履端於始或有椒花之頌豈止莊姬掩笑楚相知
慙定姜問兆齊兵不入武成二年冊拜趙國公夫人漢
王聞立義之婦邑以延鄉齊侯見有禮之妻封之石窰
異代同榮差無慙德柱國殿下居若木之一枝在天潢
之別派揚旌玉壘驅傳銅陵南通向日之民東被無雷

之國夫人從政月峽贊德雲門錦濯江波還臨織室山
明石鏡即對粧樓既而玉律頻移金爐不變胡香四兩
嗟西域之使稀靈草一枝恨瓊田之路絕天和五年四
月二十二日薨於成都之錦城春秋二十孫子荆之傷
逝怨起秋風潘安仁之悼亡悲深長簟況復仙臺永別
無復簫聲傳母長歸唯留琴曲七年二月日歸塋於長
安之洪瀆原詔贈趙國夫人禮也雲雨去來既留連於
楚后光陰離合實惆悵於陳王銘曰

河西斗絕觀津孤起章武賢臣安豐賢仕木樓千仞金
山萬里紹慶邢姨基昌宋子施衿趙北待姆秦南紘緹
禮數榆狄駢驂義超江汜仁流葛覃玉筐迎鷺金籠助
蠶敬愛純深端莊淑問有光國史無形喜愠舉案外恭
停機下訓馨馥於蘭年華於舜風雨消散神靈離絕婺
女還星姮娥歸月左楹夕奠高堂朝發空揚凌波更無
迴雲下平日隰高平日原西臨火井北望塞門猶垂雉
服尚駕魚軒平原忽矣天道何言山迴地市路沒滕城

松悲鶴去草亂螢生新雲別起舊月孤明賢墳永式節
隴常貞

周書趙王招初封趙國公竇熾其先仕魏賜姓紇丘
陵氏

周儀同松滋公拓跋競夫人尉遲氏墓誌銘

庾信

夫人諱某河南洛陽人也祖父太師柱國公魏室喪亂
經綸夷阻周朝建國匡翊揖讓圖諫帝系即有內外之
親分裂山河仍為舅甥之國夫人容範端莊儀型淑令

六義觀德南風有夫人之詩八卦成形東方有少女之位姆傳習言公宮教業箴管線續佩悅蒞蘭年十有二出適儀同拓跋競衣其翟服既得宗婦之儀乘其魚軒還從列國之禮標梅三實無闕其時天桃九華能脩其政某年某月冊拜迴洛縣君母金明公主魏文帝長女春則帝女採桑秋則王姬築館夫人出入主家遨遊戚里濯龍園苑長門宮殿既而膏腴美疢華茂傷年沉痼牀帷蒸離寒暑三世之術無乏於醫門百草之本徒窮

於藥性建德三年五月七日亡春秋三十昔西河女子
值九節之菖蒲東海婦人得三山之芝草無由再遇悲
矣如何即以其年十月十五日塋於京兆之北陵原龜
筮告辰丘陵啟奠西臨織女之廟南望湘妃之墳嗚呼
哀哉乃為銘曰

父曰帝師母曰王姬車服不繫江漢無思是生令淑觀
禮敦詩聲超宋子德茂邢姨繼世盛德思賢克舉奠鴈
迎門濡蘋實俎奉盥如事移茵即序春冰浴蠶秋機東

杼帝鄉近親帝城近臣濯龍親戚平陽主人金波迴月
玉樹臨春弄玉鳳皇昌容紫草自此千年無人得道舜
華榮曜飄零何早渭水北原平陵故園纔通谷口即望
寒門吁嗟此地去矣歸魂孟冬十月長松九年親賓掩
淚悽愴何言

周書尉遲迴尚魏文帝女金明公主夫人迴之女
了無意味之題寫得燦花相似真化工手也

唐故邢國公李密墓誌銘

魏徵

觀夫天造草昧之初有聖經綸之始原鹿逐而猶走瞻
鳥飛而未定必有異人間出命世挺生負問鼎之雄圖
鬱拔山之壯氣控御英傑鞭撻區寓志逸風颭勢傾海
岳或一丸請封函谷或八千以割鴻溝夏殷資以興亡
楚漢由其輕重懋功隳乎既立奇策敗于垂成仰龍門
以摧鱗望天池而墜翼求之前載豈代有其人者哉公
諱密字玄邃隴西成紀人自種德降祉弘道垂風導碧
海之長瀾竦閭峰之遙構家傳餘慶明哲繼軌論文德

則弼諧舜禹語武功則經綸秦漢其餘令望且公且侯
垂翠綏拖鳴玉者蓋亦耆舊未得盡傳良史莫能詳載
矣曾祖弼周大師八柱國衛公祖曜周太保魏公父寬
隋上柱國大將軍涼州總管蒲山郡公並匡周之美呂
望愧其嘉謀平吳之功杜預慙其遠略公渥注龍種丹
穴鳳鷄降列象之玄精稟成形之秀氣雲生五色一日
千里起家左親衛府東宮千牛備身超馳武帳暉映廊
廡出入龍樓光生道路隋文帝精華已竭義不斷恩始

開凌長之源將致覆宗之禍公見機而作謝病言歸優
游經史晦明藏用風塵靡雜賓友簡通交必一時之俊
談必霸王之略尚書令景武公楊素崖岸峻峙天資宏
亮壁立千仞直上萬尋嗣關西之孔子追陝東之姬旦
深謀遠鑒獨步當時公年甫弱冠時人未許景武一見
風神稱其傑出乃命諸子從而友焉並結以始終之期
申以死生之分暨有隋二世肆虐黔首三象霧塞五岳
塵飛妖灾所臻匪唯血落星隕怨讟所動寧止石言鬼

哭轍迹遍于天下徭戍窮于海外冤魂塞宇宙白骨蔽
原野墳壘發掘城郭丘墟萬里蕭條人煙斷絕公與楚
公叶契共拯橫流未息溟海之波幾及昆岡之火亡自
道中竄身草澤奮臂大呼羣雄嚮起豹變梁楚鳳翔輦
洛據敖庾而塞輶轅登太行而臨白馬九服諸侯四方
豪傑或跨州連郡或稱帝圖王合從締交爭亡秦族者
莫不驅茲青犢背彼黑山擊長轂以雷奔望高旗而
電集不期而會者以百千數遂大開幕府肇啟霸圖敷

七德以宣威掩八紘而取俊鱗羽畢萃草澤無遺于是
發人文以化之播仁義以乘之應時機以鼓之總羣策
以決之九野風馳六合雷駭彈壓趙燕振驚江漢世充
甚昆陽之敗煬帝同望夷之禍化及師殲于黎陽建德
稽顙于河朔七國之地四為我有五都之所三在域中
胡騎千羣長戟百萬飲馬則河洛可竭作氣則嵩華自
飛近無不懷遠無不肅聲溢寰宇威懾華夷屬人神乏
主以天下為己任荒裔佇來蘇之望遺黎有息肩之所

雖實下民伊賴然非上帝所臨壯志展于人謀雄圖屈
于天命始先鳴于大樹終垂翅于羣孽乃眷西顧舉茲
東夏載驅周道來謁承明帝曰念功降茲休命上柱國
邢國公拜光祿卿公雖威未振主自為謀蓋當世舊部
先附多出其右故吏後來或居其上懷漁陽之憤憤恥
從吳耿後列同淮陰之怏怏羞與絳灌為伍負其智勇
頗不自安俄屬元帥秦王經營瀝洛亦親承祕策率卒
先行既出鷄鳴之關方次休牛之塞詔命施號更盡嘉

謀公想雲夢之偽遊慮青衣之詐反心辭魏闕之下志
在江湖之上慕范蠡之高蹈追赤松之遠遊熊耳峰危
羊腸徑險降吳不可歸蜀無路短兵既接修途已窮陰
陵失道詎展拔山之力騅馬不逝徒切虞兮之歌臨陣
喪元時年三十有七故吏上柱國黎陽總管曹國公徐
世勳等表請收葬有詔許焉體質貞明機神警悟五行
一覽半面十年雅善書劍尤精文史輕一夫之勇學萬
人之敵至于三令五申之法七縱七擒之功出天入地

之奇拔幟擁沙之策莫不動如神化應變無窮負縱橫之才遇風雲之會望紫氣以驤首凌扶搖而振翮總不召之衆問獨夫之罪從我如流三分將二遂有囊括四海之志併吞六合之心既而神器有歸朝宗天闕率以從義之旅為勤王之師更名重自疑功高是懼將遠遊以逃難飜途窮而及禍惜乎高鳥未盡良弓遽折敵國猶梗謀臣已喪天子過細柳以興嗟聞鼓鼙而軫慮雅重事人之節方申詔葬之禮粵以武德二年某月日葬

于黎陽山西南五里之平原禮也故吏徐世勣等或同
嬰世網共涉難艱感意氣于一言託風雲于千載所恨
並發唐代不列元凱之功俱為漢臣獨漏山河之誓是
以慟深藥布悲甚向雄慮陵谷之推移勒斯銘于泉戶
庶使神遊楚國無慙項羽之臣魂往齊都不愧田橫之
冢乃為銘曰

如馬唐臣猶龍周史弘道百世邁德十祀帶地深源極
天峻峙玉種逾潤蘭芳不已成形騰氣成家降精餘慶

鍾美惟公挺生少表奇智早擅英聲符采發越志略縱
橫隋道方衰始開陵長覩茲兆亂緬然長想閉關晦跡
招弓莫往盤桓利居不嬰世網運居道消時逢改卜朱
旗爰止素靈已哭野戰羣龍馳走原鹿競窺周鼎爭亡
秦族時遭虜屈運偶鳳翔劬勞百戰經營四方振蕩六
合牢籠八荒始開楚霸終基漢皇羣雄並起莫恢王度
聖人既作皇天乃顧爰自東夏言遵西路來擬竇融寵
逾英布爵窮五等位登九棘惟幄參謀高衢騁力海運

方遠圖南未極縱壑擢鱗摩天墜翼熊耳失路新安殞
身長男喪楚少女留秦驚魂靡託反塋何因列樹松檟
唯餘故人

魏鄭公本傳云徵字玄成隋亂詭為道士武陽郡丞
元寶藏舉兵應李密以徵典書檄密得書稱善既聞
徵所為召之徵進十策不能用後從密來京師久之
未知名自請安輯山東乃擢秘書丞時李勣尚為密
守徵與之書勸遂定歸計竇建德陷黎陽獲徵拜起

居舍人建德敗與裴矩走入關隱太子引為洗馬按
此則鄭公不獨嘗事密且嘗事建德矣而後人斤斤
責其一節于隱太子不亦迂乎 鄭公文筆不減徐
庾而不以文字名

唐故中散大夫檢校國子祭酒兼安南都護御史
中丞充安南本管經略招討處置等使上柱國

武城縣開國男食邑三百戶張公墓誌銘

柳宗元

漢光中興馬援雄絕域之志晉武一統陶璜布殊俗之

恩理隨德成功與時並今皇帝載新景命丕冒海隅時
惟公祇復厥績交趾之理續于前人公諱某字某某郡
人也曾祖彥師朝散大夫尚書駕部郎中祖瑾懷州武
德縣令考清朝議郎試大理寺丞贈石贊善大夫咸有
懿美積為餘慶公以忠肅循其中以文術昭于外推經
旨以節吏事本法理以平人心始命蘄州蘄春主簿旬
會敏給厥聲顯揚仍以左領軍衛兵曹為安南經略巡
官申固扞衛有聞彰徹轉金吾衛判官三歷御史績用

弘大揚于天庭加檢校尚書禮部員外郎換山南東道
節度判官復轉郎中為安南副都護賜紫金魚袋充經
略副使遷檢校太子右庶子兼安南都護御史中丞充
本管經略招討處置等使公自為吏習於海邦凡其比
較勤勞利澤長久去之則夷獠稱亂復至而寇攘順化
及受命專征得陳嘉謩誓拔禍本納於夷軌乃命一其
貢奉平其斂施救人盡區處之方制國備刑體之法道
阻而通百貨地偏而具五人儲侍委積師旅無庚癸之

呼繕完板幹控帶兼戊己之位文單環王怙力背義公
於是陸聯長轂海合艨艟再舉而克殄其徒廓地數圻
以歸於我理烏蠻酋帥負險蔑德公於是外申皇威旁
達明信一動而悉朝其長取州二十以被於華風易皮
弁以冠帶化奸宄為誠敬皆用周禮率由漢儀公患浮
海之役可濟可覆而無所恃乃剏連烏以闢坦途鬼工
來并人力罕用沃日之大束成通溝靡霄之阻砮為高
岸而終古蒙利

砮音普毀也
又丑列切

公患疆場之制一彼一此

而不可常乃復銅柱為正制鼓鑄既施精堅是立固圉
之下明若白黑易野之守險逾丘陵而萬世無虞奇琛
良貨溢于王府殊俗異類盈于藁街優詔累旌其忠良
太史嗣書其功烈就加國子祭酒封武城男食邑三百
戶凡再策勲至上柱國三增秩至中散大夫某年月薨
于位年若干天子震悼傷辭有加明年其孤某官與宗
人號奉裳帷率其家老咨於叔父延唐令某卜宅于潭
州某原塋用某月某日人謀皆從龜兆襲吉乃刻茲石

著公之闕以志於丘霍以告於幽明銘曰

周限荆衡秦開百粵交州之治炎劉是設德大來服道
消自絕伏波南征漢威載烈宛陵北附晉政爰發我唐
流澤光於有截皇帝中興武城授鉞肅肅武城惟夫之
哲更歷毘贊顯揚彰徹既受休命秉茲峻節度其謀猷
守以廉潔厚農薄征匪貊匪桀通商平貨有來胥悅踐
山跨海堅其鶴列

鶴列陳兵也見列子

制器足兵潰茲蟻結烏蠻

屈服文單剪滅柔遠開疆會朝天闕銅柱乃復環山以

哲海無遺迂冠罔踰越琛賁之獻周于窮髮帝嘉成德
載旌茂閎增秩策勲土封斯裂位厄元侯年虧大耋邦
人號呼夷裔悽咽卜塋長沙連岡啟穴書銘薦辭德音
罔缺

長聯實創自柳公惟其筆妙故偉曄動人後人效之
易入惡道

吳王李煜墓誌銘

徐鉉

盛德百世善繼者所以主其祀聖人無外善守者不能

固其存蓋運歷之所推亦古今之一貫其有享蕃錫之
寵保克終之美殊恩飾瓌懿範流先傳之金石斯不誣
矣王諱煜字重光隴西人也昔庭堅贊九德伯陽恢至
道皇天眷祐錫祚于唐祖文宗武世有顯德載祀三百
龜玉淪胥宗子維城蕃衍萬國江淮之地獨奉長安故
我顯祖用膺推戴焜耀之烈載光舊吳二世承基克廣
其業皇宋將啟玄貺冥符有周開先太祖歷試威德所
及寰宇將同故我舊邦祇畏天命貶大號以稟朔獻地

圖而請吏故德義動元后風行域中恩禮有加綏懷不
世魯用天王之禮自越常鈞鄩存紀侯之國曾何足貴
王以世嫡嗣服以古道馭民欽若彛倫率循先志奉烝
嘗恭色養必以孝賓大臣事耆老必以禮居處服御必
以節言動施舍必以仁至於荷全濟之恩謹藩國之度
勤脩九貢府無虛月祇奉百役知無不為十五年間天
眷彌渥然而果於自信怠於周防西隣起釁南箕構禍
投杼致慈親之惑乞火無里婦之辭始營因壘之師終

後塗山之會太祖至仁之舉大賚為懷錄勤王之前効
恢焚謗之廣度位以上將爵為通侯待遇如初寵錫斯
厚今上宣猷大麓敷惠萬方每侍論思常存開釋及飛
天在運麗澤推恩擢進上公之封仍加掌武之秩侍從
親禮勉諭優容方將度越等曩登崇名數嗚呼閬川無
捨景命不融太平興國三年秋七月八日遘疾薨于京
師里第享年四十有二皇上撫几興悼投爪軫悲痛生
之不逮俾歿而加飾特詔輟朝三日贈太師追封吳王

命中使涖塋凡喪祭所須皆從官給即其年冬十月日
塋于河南府某縣某鄉某里禮也夫人鄭國夫人周氏
勲舊之族是生邦媛肅雍之美流詠國風才實女師言
成聞則子左千牛衛大將軍某襟神俊茂識度淹通孝
悌自表於天資才略靡由於師訓日出之學未易可量
惟王天骨秀穎神氣清粹言動有則容止可觀精究六
經旁綜百氏常以為周孔之道不可暫離經國化民發
號施令造次於是始終不渝酷好文辭多所述作一游

一豫必頌宣尼載笑載言不忘經義洞曉音律精別雅
鄭窮先王制作之意審風俗淳薄之原為文論之以續
樂記所著文集三十卷雜說百篇味其文知其道矣至
於弧矢之善筆札之工天縱多能必造精絕本以惻憶
之性仍好竺乾之教草木不殺禽魚咸遂賞人之善常
若不及掩人之過唯恐其聞以至法不勝姦威不克愛
以厭兵之俗當用武之世孔明罕應變之略不成近功
偃王躬仁義之行終於亡國道有所在復何媿歟嗚呼

哀哉二室南峙三川東注瞻上陽之宮闕望北邙之雲
樹旁寂寂兮迥野下冥冥兮長暮寄不朽於金石庶有
傳於竹素其銘曰

天鑑九德錫我唐祚繇繇瓜瓞茫茫商土裔孫有慶舊
物重覩開國承家疆吳跨楚喪亂孔棘我恤疇依聖人
既作我知所歸終日靡俟先天不違惟藩惟輔永言固
之道或汚隆時有險易蠅止于棘虎遊於市明明大君
寬仁以濟嘉爾前哲釋茲後至亦覲亦見乃侯乃公沐

浴玄澤徊翔景風如松之茂如山之崇奈何不淑運極
化窮舊國疏封新阡啟室人悲之謀卜云其吉龍章驥
德蘭言玉質邈爾何往此焉終畢儼青蓋兮排排驅素
虬兮遲遲即隧路兮徒返望君門兮永辭庶九原之可
作與緱嶺兮相期垂斯文於億載將樂石兮無虧

東軒筆記云吳王李煜薨太宗詔侍臣撰神道碑有
與徐鉉爭名者曰知吳王事莫若徐鉉太宗詔鉉撰
碑鉉泣請曰臣舊事李煜陛下容臣存故主之義乃

敢奉詔太宗許之鉉為碑但推言歷數有盡天下有
歸而已其警句云東隣遺禍南箕扇疑投杼致慈親
之惑乞火無里婦之談始勞因壘之師終後塗山之
會太宗覽讀稱善東隣謂錢俶也按此記載鉉文字
句與文鑑不同又以誌為碑不知何故然西隣作東
隣似有理袁清容集引用亦作東隣言指錢氏 鉉
字鼎臣揚州廣陵人

四六法海卷十一